

上
盤
巳
書
行
五
二

漢書問所

漢	八	八	八	八	八	八	八	八	八
書	一	一	一	一	一	一	一	一	一
門	二	〇	七	〇					
類	冊	架	函	號	類				

內	閣	文	庫
漢	八	八	八
書	一	一	一
類	冊	架	函

內閣文庫			
番號	漢	8810	
冊數	42	(2)	
函號	285	33	



綴じ部(喉部分)の文字等が開きが不鮮明な場所あり

高帝滅蜀
諸將之叛
匈奴和親
諸呂之變
南越稱藩
七國之叛
梁孝驕恣

一
三十
四十一
五十二
六十三
六十六
七十六

通鑑紀事本末卷第二



高帝滅楚

淺草文庫

秦二世二年 初楚懷王與諸將約先入定關中者王之
 當是時秦兵彊常乘勝逐北諸將莫利先入關獨項羽怨
 秦之殺項梁奮願與沛公西入關懷王諸老將皆曰項羽
 為人慄悍猾賊嘗攻襄城襄城無遺類皆阬之諸所過無
 不殘滅且楚數進取前陳王項梁皆敗不如更遣長者扶
 義而西告諭秦父兄秦父兄苦其主久矣今誠得長者往
 無侵暴宜可下項羽不可遣獨沛公素寬大長者可遣懷
 王乃不許項羽而遣沛公西略地收陳王項梁散卒以伐
 秦

秦

通鑑紀事本末卷第二



漢高祖元年冬十月沛公西入咸陽諸將皆爭走金帛財物之府分之蕭何獨先入收秦丞相府圖籍藏之以此沛公得具知天下阨塞戶口多少彊弱之處沛公見秦宮室帷帳狗馬重寶婦女以千數意欲留居之樊噲諫曰沛公欲有天下耶將爲富家翁耶凡此奢麗之物皆秦所以亡也沛公何用焉願急還霸上無留宮中沛公不聽張良曰秦爲無道故沛公得至此夫爲天下除殘賊宜編素爲資今始入秦即安其樂此所謂助桀爲虐且忠言逆耳利於行毒藥苦口利於病願沛公聽樊噲言沛公乃還軍霸上十一月沛公悉召諸縣父老豪傑謂曰父老苦秦苛法久矣吾與諸侯約先入關者王之吾當王關中與父老約法三章耳殺人者死傷人及盜抵罪餘悉除去秦法諸吏民皆案堵如故凡吾所以來爲父老除害非有所侵暴無恐且吾所以還軍霸上待諸侯至而定約束耳乃使人與秦吏行縣鄉邑告諭之秦民大喜爭持牛羊酒食獻饗軍士沛公又讓不受曰倉粟多非乏不欲費民民又益喜唯恐沛公不爲秦王項羽既定河北率諸侯兵欲西入關先是諸侯吏卒繇使屯戍過秦中者秦中吏卒遇之多無狀及章邯以秦軍降諸侯吏卒乘勝多奴虜使之輕折辱秦吏卒秦吏卒多怨竊言曰章將軍詐吾屬降諸侯今能入關破秦大善卽不能諸侯虜吾屬而東秦又盡誅吾父母妻子奈何諸將微聞其計以告項羽項羽召黥布蒲將軍

計曰秦吏卒尚衆其心不服至關不聽事必危不如擊殺之而獨與章邯長史欣都尉翳入秦於是楚軍夜擊阬秦卒二十餘萬人新安城南 或說沛公曰秦富十倍天下地形疆聞項羽號章邯爲雍王王關中今則來沛公恐不得有此可急使兵守函谷關無內諸侯軍稍徵關中兵以自益距之沛公然其計從之已而項羽至關關門閉聞沛公已定關中大怒使黥布等攻破函谷關十二月項羽進至戲沛公左司馬曹無傷使人言項羽曰沛公欲王關中令子嬰爲相珍寶盡有之欲以求封項羽大怒饗士卒期旦日擊沛公軍當是時項羽兵四十萬號百萬在新豐鴻門沛公兵十萬號二十萬在霸上范增說項羽曰沛公居

山東時貪財好色今入關財物無所取婦女無所幸此其志不在小吾令人望其氣皆爲龍虎成五采此天子氣也急擊勿失楚左尹項伯者項羽季父也素善張良乃夜馳之沛公軍私見張良具告以事欲呼與俱去曰毋俱死也張良曰臣爲韓王送沛公沛公今有急亡去不義不可不語良乃入具告沛公沛公大驚良曰料公士卒足以當項羽乎沛公默然曰固不如也且爲之柰何張良曰請往謂項伯言沛公之不敢叛也沛公曰君爲我呼入良出固要項伯項伯卽入見沛公沛公奉卮酒爲壽約爲婚姻曰吾入關秋毫不敢有所近籍吏民封府庫而待將軍所以遣將守關者備他盜之出入與非常也日夜望將軍至豈敢

反乎願伯具言臣之不敢倍德也項伯許諾謂沛公曰旦日不可不蚤自來謝沛公曰諾於是項伯復夜去至軍中具以沛公言報項羽因言曰沛公不先破關中公豈敢入乎今人有大功而擊之不義也不如因善遇之項羽許諾沛公旦日從百餘騎來見項羽鴻門謝曰臣與將軍戮力而攻秦將軍戰河北臣戰河南不自意能先入關破秦得復見將軍於此今者有小人之言令將軍與臣有隙項羽因曰此沛公左司馬曹無傷言之不然籍何以至此項羽因留沛公與飲范增數目項羽舉所佩玉玦以示之者三項羽默然不應范增起出召項莊謂曰君王爲人不忍若入前爲壽壽畢請以劍舞因擊沛公於坐殺之不者若屬皆且爲所虜莊則入爲壽壽畢曰軍中無以爲樂請以劍舞項羽曰諾項莊拔劍起舞項伯亦拔劍起舞常以身翼蔽沛公莊不得擊於是張良至軍門見樊噲噲曰今日之事何如良曰今項莊拔劍舞其意常在沛公也噲曰此迫矣臣請入與之同命噲卽帶劍擁盾入軍門衛士欲止不內樊噲側其盾以撞衛士仆地遂入披帷立踴目視項羽頭髮上指目眦盡張項羽按劍而跽曰客何爲者張良曰沛公之參乘樊噲也項羽曰壯士賜之卮酒噲立而飲之項羽曰壯士復能飲乎樊噲曰臣死且不避卮酒安足辭夫秦有虎狼之心殺人如不能舉刑人如恐不勝天下皆叛之懷王與諸將約曰先破秦入咸陽者王之今沛公先破

秦入咸陽毫毛不敢有所近還軍霸上以待將軍勞苦而功高如此未有封爵之賞而聽細人之說欲誅有功之人此亡秦之續耳竊爲將軍不取也項羽未有以應曰坐樊噲從良坐坐須臾沛公起如廁因招樊噲出沛公曰今者出未辭也爲之柰何樊噲曰如今人方爲刀俎我方爲魚肉何辭爲於是遂去鴻門去霸上四十里沛公則置車騎脫身獨騎樊噲夏侯靳彊紀信等四人持劍盾步走從驪山下道芷陽間行趣霸上留張良使謝項羽以白璧獻羽王斗與亞父沛公謂良曰從此道至吾軍不過二十里耳度我至軍中公乃入沛公已去間至軍中張良入謝曰沛公不勝枵枵不能辭謹使臣良奉白璧一雙再拜獻將軍足下王斗一雙再拜奉亞父足下項羽曰沛公安在良曰聞將軍有意督過之脫身獨去已至軍矣項羽則受璧置之坐上亞父受王斗置之地板劍撞而破之曰唉豎子不足與謀奪將軍天下者必沛公也吾屬今爲之虜矣沛公至軍立誅殺曹無傷居數日項羽引兵西屠咸陽殺秦降王子嬰燒秦宮室火三月不滅收其貨寶婦女而東秦民大失望韓生說項羽曰關中阻山帶河四塞之地地肥饒可都以霸項羽見秦宮室皆已燒殘破又心思東歸曰富貴不歸故鄉如衣繡夜行誰知之者韓生退曰人言楚人沐猴而冠耳果然項羽聞之烹韓生項羽使人致命懷王懷王曰如約項羽怒曰懷王者吾家所立耳非有功伐

何以得專主約天下初發難時假立諸侯後以伐秦然身被堅執銳首事暴露於野三年滅秦定天下者皆將相諸君與籍之力也懷王雖無功固當分其地而王之諸將皆曰善春正月羽陽尊懷王爲義帝曰古之帝者地方千里必居上游乃徙義帝於江南都郴二月羽分天下王諸將羽自立爲西楚霸王梁楚地九郡都彭城羽與范增疑沛公而業已講解又惡負約乃陰謀曰巴蜀道險秦之遷人皆居之乃曰巴蜀亦關中地也故立沛公爲漢王王巴蜀漢中都南鄭而三分關中王秦降將以距塞漢路章邯爲雍王王咸陽以西都廢丘長史欣者故爲櫟陽獄掾嘗有德於項梁都尉董騫者本勸章邯降楚故立欣爲塞王王咸陽以東至河都櫟陽立騫爲翟王王上郡都高奴項羽欲自取梁地乃徙魏王豹爲西魏王王河東都平陽瑕丘申陽者張耳嬖臣也先下河南郡迎楚河上故立申陽爲河南王都洛陽韓王成因故都都陽翟趙將司馬卬定河內數有功故立爲殷王王河內都朝歌徙趙王歇爲代王趙相張耳素賢又從入關故立耳爲常山王王趙地治襄國當陽君黥布爲楚將常冠軍故立布爲九江王都六番君吳芮率百越佐諸侯又從入關故立芮爲衡山王都邾義帝柱國共敖將兵擊南郡功多因立敖爲臨江王都江陵徙燕王韓廣爲遼東王都無終燕將臧荼從楚救趙因從入關故立荼爲燕王都薊徙齊王田市爲膠東王都

卽墨齊將田都從楚救趙因從入關故立都爲齊王都臨菑項羽方渡河救趙田安下濟北數城引其兵降項羽故立安爲濟北王都博陽田榮數負項梁又不肯將兵從楚擊秦以故不封成安君陳餘棄將印去不從入關亦不封客多說項羽曰張耳陳餘一體有功於趙今耳爲王餘不可以不封羽不得已聞其在南皮因環封之三縣番君將梅銷功多封十萬戶侯漢王怒欲攻項羽周勃灌嬰樊噲皆勸之蕭何諫曰雖王漢中之惡不猶愈於死乎漢王曰何爲乃死也何曰今衆弗如百戰百敗不死何爲夫能誦於一人之下而信於萬乘之上者湯武是也臣願大王王漢中養其民以致賢人收用巴蜀還定三秦天下可圖也

漢王曰善乃遂就國以何爲丞相漢王賜張良金百鎰珠二斗良具以獻項伯漢王亦因令良厚遣項伯使盡請漢中地項王許之夏四月諸侯罷戲下兵各就國項王使卒三萬人從漢王之國楚與諸侯之慕從者數萬人從杜南入蝕中張良送至褒中漢王遣良歸韓良因說漢王燒絕所過棧道以備諸侯盜兵且示項羽無東意六月田榮殺齊王市自立爲齊王初淮陰人韓信家貧無行不得推擇爲吏及項梁渡淮信杖劍從之居麾下無所知名項梁敗又屬項羽羽以爲郎中數以策干羽羽不用漢王之入蜀信亡楚歸漢信數與蕭何語何竒之漢王至南鄭諸將及士卒皆歌謳思東歸多道亡者信度何等已數言王

王不我用卽亡去何聞信亡不及以聞自追之人有言王曰丞相何亡王大怒如失左右手居一二日何來謁王王且怒且喜罵何曰若亡何也何曰臣不敢亡也臣追亡者耳王曰若所追者誰何曰韓信也王復罵曰諸將亡者以十數公無所追追信詐也何曰諸將易得耳至如信者國士無雙王必欲長王漢中無所事信必欲爭天下非信無可與計事者顧王策安所決耳王曰吾亦欲東耳安能鬱鬱久居此乎何曰計必欲東能用信信卽留不能用信終亡耳王曰吾爲公以爲將何曰雖爲將信不留王曰以爲大將何曰幸甚於是王欲召信拜之何曰王素慢無禮今拜大將如呼小兒此乃信所以去也王必欲拜之擇良日齋戒設壇場具禮乃可耳王許之出將皆喜人人各自以爲得大將至拜大將乃韓信也一軍皆驚信拜禮畢上坐王曰丞相數言將軍將軍何以教寡人計策信辭謝因問王曰今東鄉爭權天下豈非項王邪漢王曰然曰大王自料勇悍仁彊孰與項王漢王默然良久曰不如也信再拜賀曰惟信亦以爲大王不如也然臣嘗事之請言項王之爲人也項王喑噁叱咤千人皆廢然不能任屬賢將此特匹夫之勇耳項王見人恭敬慈愛言語嘔嘔人有疾病涕泣分食飲至使人有功當封爵者印剗敝忍不能予此所謂婦人之仁也項王雖霸天下而臣諸侯不居關中而都彭城背義帝之約而以親愛王諸侯不平逐其故主而王

其將相又遷逐義帝置江南所過無不殘滅百姓不親附
特劫於威彊耳名雖爲霸實失天下心故其彊易弱今大
王誠能反其道任天下武勇何所不誅以天下城邑封功
臣何所不服以義兵從思東歸之士何所不散且三秦王
爲秦將將秦子弟數歲矣所殺亡不可勝計又欺其衆降
諸侯至新安項王詐坑秦降卒二十餘萬唯獨邯欣翳得
脫秦父兄怨此三人痛入骨髓今楚彊以威王此三人秦
民莫愛也大王之入武關秋毫無所害除秦苛法與秦民
約法三章秦民無不欲得大王王秦者於諸侯之約大王
當王關中關中民咸知之大王失職入漢中秦民無不恨
者今大王舉而東三秦可傳檄而定也於是漢王大喜自
以爲得信晚遂聽信計部署諸將所擊留蕭何收巴蜀租
給軍糧食八月漢王引兵從故道出襲雍雍王章邯迎擊
漢陳倉雍兵敗還走止戰好時又敗走廢丘漢王遂定雍
地東至咸陽引兵圍雍王於廢丘而遣諸將略地塞王欣
翟王翳皆降以其地爲渭南河上上郡令將軍薛歐王吸
出武關因王陵兵以迎太公呂后項王聞之發兵距之陽
夏不得前王陵者沛人也先聚黨數千人居南陽至是始
以兵屬漢項王取陵毋置軍中陵使至則東鄉坐陵母欲
以招陵陵毋私送使者泣曰願爲老妾語陵善事漢王漢
王長者終得天下毋以老妾故持二心妾以死送使者遂
伏劍而死項王怒烹陵母 項王以故吳令鄭昌爲韓王

以距漢 張良遺項王書曰漢王失職欲得關中如約即止不敢東又以齊梁反書遺項王曰齊欲與趙并滅楚項王以此故無西意而北擊齊 項王使趣義帝行其羣臣左右稍稍叛之 二年冬十月項王密使九江衡山臨江王擊義帝殺之江中 陳餘悉三縣兵與齊兵共襲常山常山王張耳敗走漢謁漢王於廢丘漢王厚遇之陳餘迎趙王於代復為趙王趙王德陳餘立以為代王陳餘為趙王弱國初定不之國留傳趙王而使夏說以相國守代

張良自韓間行歸漢漢王以為成信侯良多病未嘗特將常為書策臣時時從漢王 漢王如陝鎮撫關外父老河南王申陽降置河南郡 漢王以韓襄王孫信為韓太尉將兵略韓地信急擊韓王昌於陽城昌降十一月立信為韓王常將韓兵從漢王 漢王還都櫟陽 諸將拔隴

西 春正月項王北至城陽齊王榮將兵會戰敗走平原平原民殺之項王復立田假為齊王遂北至北海燒夷城郭室屋坑田榮降卒係虜其老弱婦女所過多所殘滅齊民相聚叛之 漢將拔北地虜雍王弟平 三月漢王自臨晉渡河魏王豹降將兵從下河內虜殷王卬置河內郡

初陽武人陳平事魏王咎於臨濟為太僕說魏王不聽人或讒之平亡去後事項羽賜爵為卿殷王反楚項羽使平擊降之還拜為都尉賜金二十鎰居無何漢王攻下殷項王怒將誅定殷將吏平懼乃封其金與印使使歸項王而

挺身間行杖劍亡渡河歸漢王於脩武因魏無知求見漢王漢王召入賜食遣罷就舍平曰臣爲事來所言不可以過今日於是漢王與語而說之問曰子之居楚何官曰爲都尉是日卽拜平爲都尉使爲參乘典護軍諸將盡謹曰大王一日得楚之亡卒未知其高下而卽與同載反使監護長者漢王聞之愈益幸平 漢王南渡平陰津至洛陽新城三老董公遮說王曰臣聞順德者昌逆德者亡兵出無名事故不成故曰明其爲賊敵乃可服項羽爲無道放殺其主天下之賊也夫仁不以勇義不以力大王宜率三軍之衆爲之素服以告諸侯而伐之則四海之內莫不仰德此三王之舉也於是漢王爲義帝發喪祖而大哭哀臨

三日發使告諸侯曰天下共立義帝北面事之今項羽放殺義帝江南大逆無道寡人悉發關中兵收三河士南浮江漢以下願從諸侯王擊楚之殺義帝者使者至趙陳餘曰漢殺張耳乃從於是漢王求人類張耳者斬之持其頭遺陳餘餘乃遣兵助漢 田榮弟橫收散卒得數萬人起城陽夏四月立榮子廣爲齊王以拒楚項王因留連戰未能下雖聞漢東旣擊齊欲遂破之而後擊漢漢王以故得率諸侯兵凡五十六萬人伐楚到外黃彭越將其兵三萬餘人歸漢漢王曰彭將軍收魏地得十餘城欲急立魏後今西魏王豹直魏後乃拜彭越爲魏相國檀將其兵略定梁地漢王遂入彭城收其貨寶美人日置酒高會項王聞

之令諸將擊齊而自以精兵三萬人南從魯出胡陵至蕭
晨擊漢軍而東至彭城日中大破漢軍漢軍皆走相隨入
穀泗水死者十餘萬人漢卒皆南走山楚又追擊至靈壁
東睢水上漢軍却爲楚所擠卒十餘萬人皆入睢水水爲
之不流圍漢王三匝會大風從西北起折木發屋揚沙石
窈冥晝晦逢迎楚軍大亂壞散而漢王乃得與數十騎遁
去欲過沛收家室而楚亦使人之沛取漢王家室皆亡不
與漢王相見漢王道逢孝惠魯元公主載以行楚騎追之
漢王急推墮二子車下滕公爲太僕常下收載之如是者
三曰今雖急不可以驅奈何棄之故徐行漢王怒欲斬之
者十餘滕公卒保護脫二子審食其從太公呂后間行求
漢王不相遇及遇楚軍楚軍與歸項王常置軍中爲質是
時呂后兄周呂侯爲漢將兵居下邑漢王間往從之稍稍
收其士卒諸侯皆背漢復與楚塞王欣翟王翳亡降楚
田橫進攻田假假走楚楚殺之橫遂復定三齊之地漢
王問羣臣曰吾欲捐關以東等棄之誰可與共功者張良
曰九江王布楚梟將與項王有隙彭越與齊反梁地此兩
人可急使而漢王之將獨韓信可屬大事當一面卽欲捐
之捐之此三人則楚可破也初項王擊齊徵兵九江九江
王布稱病不往遣將將軍數千人行漢之破楚彭城布又
稱病不佐楚楚王由此怨布數使使者誚讓召布布愈恐
不敢往項王方北憂齊趙西患漢所與者獨九江王又多

漢王使二十人俱

布材欲親用之以故未之擊漢王自下邑徙軍碭遂至虞
謂左右曰如彼等者無足與計天下事謁者隋何進曰不
審陛下所謂漢王曰孰為我使九江令之發兵倍楚留項
王數月我之取天下可以百全隋何曰臣請使之漢王使
之漢王使與二十人俱 五月漢王至滎陽諸敗軍皆會
蕭何亦發關中老弱未傅者悉詣滎陽漢軍復大振楚起
於彭城常乘勝逐北與漢戰滎陽南京索間楚騎來眾漢
王擇軍中可為騎將者皆推故秦騎士重泉人李必駱甲
漢王欲拜之必甲曰臣故秦民恐軍不信臣願得大王左
右善騎者傅之乃拜灌嬰為中大夫令李必駱甲為左右
校尉將騎兵擊楚騎於滎陽東大破之楚以故不能過滎
陽而西漢王軍滎陽築甬道屬之河以取敖倉粟 魏王
豹謁歸視親疾至則絕河津及為楚六月漢王還櫟陽
漢兵引水灌廢丘廢丘降章邯自殺盡定雍地以為中地
北地隴西郡 秋八月漢王如滎陽命蕭何守關中侍太
子為法令約束立宗廟社稷宮室縣邑事有不及奏決者
輒以便宜施行上來以聞計關中戶口轉漕調兵以給軍
未嘗乏絕 漢王使酈食其往說魏王豹且召之豹不聽
曰漢王慢而侮人罵詈諸侯羣臣如罵奴耳吾不忍復見
也於是漢王以韓信為左丞相與灌嬰曹參俱擊魏漢王
問食其魏大將誰也對曰栢直王曰是口尚乳臭安能當
韓信騎將誰也曰馮敬曰是秦將馮無擇子也雖賢不當

灌嬰步卒將誰也曰項它曰不能當曹參吾無患矣韓信亦問酈生魏得無用周叔爲大將乎酈生曰栢直也信曰豎子耳遂進兵魏王盛兵蒲坂以塞臨晉信乃益爲疑兵陳船欲渡臨晉而伏兵從夏陽以木罌渡軍襲安邑魏王豹驚引兵迎信九月信擊虜豹傳詣滎陽悉定魏地置河東上黨太原郡漢之敗於彭城而西也陳餘亦覺張耳不死卽背漢韓信既定魏使人請兵三萬人願以北舉燕趙東擊齊南絕楚糧道漢王許之乃遣張耳與俱引兵東北擊趙代後九月信破代兵禽夏說於閼與信之下魏破代漢輒使人收其精兵詣滎陽以距楚

三年冬十月韓信張耳以兵數萬東擊趙趙王及成安君陳餘聞之聚兵井陘口號二十萬廣武君李左車說成安君曰韓信張耳乘勝而去國遠鬪其鋒不可當臣聞千里餽糧士有饑色樵蘇後爨師不宿飽今井陘之道車不得方軌騎不得成列行數百里其勢糧食必在其後願足下假臣奇兵三萬人從間路絕其輜重足下深溝高壘勿與戰彼前不得鬪退不得還野無所掠不至十日而兩將之頭可致於麾下否則必爲二子所禽矣成安君嘗自稱義兵不用詐謀奇計曰韓信兵少而疲如此避而不擊則諸侯謂吾怯而輕來伐我矣韓信使人間視知其不用廣武君策則大喜乃敢引兵遂下未至井陘口三十里止舍夜半傳發選輕騎二千人人持一赤幟從間道草山而望趙

軍誠曰趙見我走必空壁逐我若疾入趙壁拔趙幟立漢赤幟令其裨將傅餐曰今日破趙會食諸將皆莫信佯應曰諾信曰趙已先據便地爲壁且彼未見吾大將旗鼓未肯擊前行恐吾至阻險而還也乃使萬人先行出背水陳趙軍望見而大笑平旦信建大將旗鼓行出井陘口趙開壁擊之大戰良久於是信與張耳佯棄鼓旗走水上軍水上軍開入之復疾戰趙果空壁爭漢旗鼓逐信耳信耳已趙空壁逐利則馳入趙壁皆拔趙旗立漢赤幟二千趙軍已不能得信等欲還歸壁壁皆漢赤幟見而大驚以爲漢皆已得趙王將矣兵遂亂遁走趙將雖斬之不能禁也於是漢兵夾擊大破趙軍斬成安君泜水上禽趙王歇諸將效首虜畢賀因問信曰兵法右倍山陵前左水澤今者將軍令臣等背水陳曰破趙會食臣等不服然竟以勝此何術也信曰此在兵法顧諸君不察耳兵法不曰陷之死地而後生置之亡地而後存且信非得素拊循士大夫也此所謂驅市人而戰之其勢非置之死地使人人自爲戰今予之生地皆走寧尚可得而用之乎諸將皆服曰善非臣所及也信募生得廣武君者于千金有縛致麾下者信解其縛東鄉坐師事之問曰僕欲北攻燕東伐齊何若而有功廣武君辭謝曰臣敗亡之慮何足以權大事乎信曰僕聞之百里奚居虞而虞亡在秦而秦霸非愚於虞而智

於秦也用與不用聽與不聽也誠令成安君聽足下計若
信者亦已爲禽矣以不用足下故信得侍耳今僕委心歸
計願足下勿辭廣武君曰今將軍涉西河虜魏王禽夏說
東下井陘不終朝而破趙二十萬衆誅成安君名聞海內
威震天下農夫莫不輟耕釋耒禴衣甘食傾耳以待命者
此將軍之所長也然而衆勞卒罷其實難用今將軍欲舉
倦敝之兵頓之燕堅城之下欲戰不得攻之不拔情見勢屈
曠日持久糧食單竭燕旣不服齊必距境以自彊燕齊相
持而不下則劉項之權未有所分也此將軍所短也善用
兵者不以短擊長而以長擊短韓信曰然則何由廣武君
對曰方今爲將軍計莫如按甲伏兵鎮撫趙民百里之內

牛酒日至以饗士大夫北首燕路而後遣辯士奉咫尺之
書暴其所長於燕燕必不敢不聽從燕已從而東臨齊雖
有智者亦不知爲齊計矣如是則天下事皆可圖也兵固
有先聲而後實者此之謂也韓信曰善從其策發使使燕
燕從風而靡遣使報漢且請以張耳王趙漢王許之楚數
使奇兵渡河擊趙張耳韓信往來救趙因行定趙城邑發
兵詣漢 十一月隋何至九江九江太宰主之三日不得
見隋何說太宰曰王之不見何必以楚爲彊以漢爲弱也
此臣之所以爲使使何得見言之而是大王所欲聞也言
之而非使何等二十人伏斧質九江市足以明王倍漢而
與楚也太宰乃言之王王見之隋何曰漢王使臣敬進書

大王御者竊惟大王與楚何親也九江王曰寡人北鄉而臣事之隋何曰大王與項王俱列爲諸侯北鄉而臣事之者必以楚爲彊可以託國項王伐齊身負版築爲士卒先大王宜悉九江之衆身自將之爲楚前鋒今乃發四千人以助楚夫北面而臣事人者固若是乎漢王入彭城項王未出齊也大王宜悉九江之兵渡淮日夜會戰彭城下大王乃撫萬人之衆無一人渡淮者垂拱而觀其孰勝夫託國於人者固若是乎大王提空名以鄉楚而欲厚自託臣竊爲大王不取也然而大王不肯楚者以漢爲弱也夫楚兵雖彊天下負之以不義之名以其背盟約而殺義帝也

漢王收諸侯還守成臯榮陽下蜀漢之粟深溝壁壘分卒守徼乘塞楚人深入敵國八九百里老弱轉糧千里之外

漢堅守而不動楚進則不得攻退則不能解故曰楚兵不足恃也使楚勝漢則諸侯自危懼而相救夫楚之彊適足以致天下之兵耳故楚不如漢其勢易見也今大王不與萬全之漢而自託於危亡之楚臣竊爲大王惑之臣非以九江之兵足以亡楚也大王發兵而倍楚項王必留留數月漢之取天下可以萬全臣請與大王提劍而歸漢漢王必裂地而封大王又况九江必大王有也九江王曰請奉命陰許鄉楚與漢未敢泄也楚使者在九江舍傳舍方急責布發兵隋何直入坐楚使者上曰九江王已歸漢楚何以得發兵布愕然楚使者起何因說布曰事已太上可遂殺

楚使者無使歸而疾走漢并力布曰如使者教於是殺楚使者因起兵而攻楚楚使項聲龍且攻九江數月龍且破九江軍布欲引兵走漢恐楚兵殺之乃間行與何俱歸漢十二月九江王至漢漢王方踞牀洗足召布入見布大怒悔來欲自殺及出就舍帳御飲食從官皆如漢王居布又大喜過望於是乃使人入九江楚已使項伯收九江兵盡殺布妻子布使者頗得故人幸臣將衆數千人歸漢漢益九江王兵與俱屯成皐楚數侵奪漢甬道漢軍乏食漢王與酈食其謀撓楚權食其曰昔湯伐桀封其後於杞武王伐紂封其後於宋今秦失德棄義侵伐諸侯滅其社稷使無立錐之地陛下誠能復立六國之後此其君臣百姓必皆戴陛下之德莫不鄉風慕義願爲臣妾德義已行陛下南鄉稱霸楚必斂衽而朝漢王曰善趣刻印先生因行佩之矣食其未行張良從外來謁漢王方食曰子房前客有爲我計撓楚權者具以酈生語告良曰何如良曰誰爲陛下畫此計者陛下事去矣漢王曰何哉對曰臣請借前箸爲大王籌之昔湯武封桀紂之後者度能制其死生之命也今陛下能制項籍之死命乎其不可一也武王入殷表商容之間釋箕子之囚封比干之墓今陛下能乎其不可二也發鉅橋之粟散鹿臺之錢以賜貧窮今陛下能乎其不可三也殷事已畢偃革爲軒倒載干戈示天下不復用兵今陛下能乎其不可四也休馬華山之陽示以無爲

今陛下能乎其不可五也放牛桃林之陰以示不復輸積
今陛下能乎其不可六也天下游士離其親戚棄墳墓去
故舊從陛下游者徒欲日夜望咫尺之地今復立六國之
後天下游士各歸事其主從其親戚反其故舊墳墓陛下
與誰取天下乎其不可七也且夫楚唯無彊六國立者復
撓而從之陛下焉得而臣之其不可八也誠用客之謀陛
下事去矣漢王輟食吐哺罵曰豎儒幾敗而公事令趣銷
印 荀悅論曰夫立策決勝之術其要有三一曰形二曰
勢三曰情形者言其大體得失之數也勢者言其臨時之
宜進退之機也情者言其心志可否之實也故策同事等
而功殊者三術不同也初張耳陳餘說陳涉以復六國自
爲樹黨酈生亦說漢王所以說者同而得失異者陳涉之
起天下皆欲亡秦而楚漢之分未有所定今天下未必欲
亡項也故立六國於陳涉所謂多已之黨而益秦之敵也
且陳涉未能專天下之地也所謂取非其有以與於人行
虛惠而獲實福也立六國於漢王所謂割已之有而以資
敵設虛名而受實禍也此同事而異形者也及宋義待秦
趙之斃於昔卞莊刺虎同說者也施之戰國之時鄰國相
攻無臨時之急則可也戰國之立其日久矣一戰勝敗未
必以存亡也其勢非能急於亡敵國也進乘利退自保故
累力待時承敵之斃其勢然也今楚趙所起其與秦勢不
竝立安危之機呼吸成變進則定功退則受禍此同事而

異勢者也伐趙之役韓信軍於泜水之上而趙不能敗彭城之難漢王戰于睢水之上士卒皆赴入睢水而楚兵大勝何則趙兵出國迎戰見可而進知難而退懷內顧之心無出死之計韓信軍孤在水上士卒必死無有二心此信之所以勝也漢王深入敵國置酒高會士卒逸豫戰心不固楚以彊大之威而喪其國都士卒皆有憤激之氣救敗赴亡之急以決一旦之命此漢之所以敗也且韓信選精兵以守而趙以內顧之士攻之項羽選精兵以攻而漢以怠惰之卒應之此同事而異情者也故曰權不可預設變不可先圖與時遷移應物變化設策之機也漢王謂陳

平日天下紛紛何時定乎陳平曰項王骨鯁之臣惡父鍾離昧龍且周殷之屬不過數人耳大王誠能出捐數萬斤

金行反間間其君臣以疑其心項王爲人意忌信讒必內相誅漢因舉兵而攻之破楚必矣漢王曰善乃出黃金四萬斤與平恣所爲不問其出入平多以金縱反間於楚軍宣言諸將鍾離昧等爲項王將功多矣然而終不得裂地而王欲與漢爲一以滅項氏而分王其地項羽果意不信鍾離昧等夏四月楚圍漢王於滎陽急漢王請和割滎陽以西者爲漢亞父勸羽急攻滎陽漢王患之項王使使至漢陳平使爲太牢具舉進見楚使卽佯驚曰吾以爲亞父使乃項王使復持去更以惡草具進楚使歸具以報項王項王果大疑亞父亞父欲急攻下滎陽城項王不信

不肯聽亞父聞項王疑之乃怒曰天下事大定矣君王自爲之願請骸骨歸未至彭城疽發背而死五月將軍紀信言於漢王曰事急矣臣請誑楚王可以間出於是陳平夜出女子東門二千餘人楚因四面擊之紀信乃乘王車黃屋左纛曰食盡漢王降楚楚皆呼萬歲之城東觀以故漢王得與數十騎出西門遁去令韓王信與周苛魏豹縱公守滎陽羽見紀信問漢王安在曰已出去矣羽燒殺信周苛縱公相謂曰反國之王難與守城因殺魏豹漢王出滎陽至成臯入關收兵欲復東轅生說漢王曰漢與楚相距滎陽數歲漢常困願君王出武關項王必引兵南走王深壁勿戰令滎陽成臯間且得休息使韓信等得安輯河北趙地連燕齊君王乃復走滎陽如此則楚所備者多力分漢得休息復與之戰破之必矣漢王從其計出軍宛葉間與黥布行收兵羽聞漢王在宛果引兵南漢王堅壁不與戰漢王之敗彭城解而西也彭越皆亡其所下城獨將其兵北居河上常往來爲漢游兵擊楚絕其後糧是月彭越度睢與項聲薛公戰下邳破殺薛公羽乃使終公守成臯而自東擊彭越漢王引兵北擊破終公復軍成臯六月羽已破走彭越聞漢復軍成臯乃引兵西拔滎陽城生得周苛羽謂苛爲我將以公爲上將軍封三萬戶周苛罵曰若不趨降漢今爲虜矣若非漢王敵也羽烹周苛并殺縱公而虜韓王信遂圍成臯漢王逃獨與滕公共車出成臯

王門北渡河宿小脩武傳舍晨自稱漢使馳入趙壁張耳韓信未起卽其臥內奪其印符以麾召諸將易置之信耳起乃知漢王來大驚漢王既奪兩人軍卽令張耳循行備守趙地拜韓信爲相國收趙兵未發者擊齊諸將稍稍得出成臯從漢王楚遂拔成臯欲西漢使兵距之鞏令其不得西 秋七月漢王得韓信軍復大振八月引兵臨河南鄉軍小脩武欲復與楚戰郎中鄭忠說上漢王使高壘深塹勿與戰漢王聽其計使將軍劉賈盧縮將卒二萬人騎數百度白馬津入楚地佐彭越燒楚積聚以破其業無以給項王軍食而已楚兵擊劉賈賈輒堅壁不肯與戰而與彭越相保 彭越攻向梁地下睢陽外黃等十七城九月項王謂大司馬曹咎曰謹守成臯卽漢王欲挑戰慎勿與戰勿令得東而已我十五日必定梁地復從將軍羽引兵東行擊陳留外黃睢陽等城皆下之 漢王欲捐成臯以東屯鞏洛以距楚酈生曰臣聞知天之天者王事可成王者以民爲天而民以食爲天夫敖倉天下轉輸久矣臣聞其下乃有藏粟甚多楚人拔滎陽不堅守敖倉乃引而東令適卒分守成臯此乃天所以資漢也方今楚易取而漢反却自奪其便臣竊以爲過矣且兩雄不俱立楚漢又相持不決海內搖蕩農夫釋耒工女下機天下之心未有所定也願足下急復進兵收取滎陽據敖倉之粟塞成臯之險杜大行之道距蜚狐之口守白馬之津以示諸侯形制

之勢則天下知所歸矣王從之乃復謀取敖倉食其又說
王曰方今燕趙已定唯齊未下諸田宗彊負海岱阻河濟
南近於楚人多變詐足下雖遣數萬師未可以歲月破也
臣請得奉明詔說齊王使爲漢而稱東藩上曰善乃使酈
生說齊王曰王知天下之所歸乎王曰不知也天下何所
歸酈生曰歸漢曰先生何以言之曰漢王先入咸陽項王
負約王之漢中項王遷殺義帝漢王聞之起蜀漢之兵擊
三秦出關而責義帝之處收天下之兵立諸侯之後降城
卽以侯其將得賂卽以分其士與天下同其利豪英賢才
皆樂爲之用項王有倍約之名殺義帝之負於人之功無
所記於人之罪無所忘戰勝而不得其賞拔城而不得其
封非項氏莫得用事天下畔之賢才怨之而莫爲之用故
天下之事歸於漢王可坐而策也夫漢王發蜀漢定三秦
涉西河破北魏出井陘誅成安君此非人力也天之福
也今已據敖倉之粟塞成臯之險守白馬之津杜太行之
阪距蜚狐之口天下後服者先亡矣王疾先下漢王齊國
可得而保也不然危亡可立而待也先是齊聞韓信且東
兵使華無傷田解將重兵屯歷下以距漢及納酈生之言
遣使與漢平乃罷歷下守戰備與酈生日縱酒爲樂韓信
引兵東未度平原聞酈食其已說下齊欲止辯士蒯徹說
信曰將軍受詔擊齊而漢獨發間使下齊寧有詔止將軍
乎何以得毋行也且酈生一士伏軾掉三寸之舌下齊七

十餘城將軍以數萬衆歲餘乃下趙五十餘城爲將數歲反不如一豎儒之功乎於是信然之遂渡河

四年冬十月信襲破齊歷下軍遂至臨淄齊王以酈生爲賣已乃烹之引兵東走高密使使之楚請救田橫走博陽守相田光走城陽將軍田既軍於膠東 楚大司馬咎守成臯漢數挑戰楚軍不出使人辱之數日咎怒渡兵汜水士卒半渡漢擊之大破楚軍盡得楚國金玉貨賂咎及司馬欣皆自剄汜水上漢王引兵渡河復取成臯軍廣武就敖倉食項羽下梁地十餘城聞成臯破乃引兵還漢軍方圍鍾離昧於滎陽東聞羽至盡走險阻羽亦軍廣武與漢相守數月楚軍食少項王患之乃爲高祖置太公其上告

漢王曰今不急下吾烹太公漢王曰吾與羽俱北面受命懷王約爲兄弟吾翁卽若翁必欲烹而翁幸分我一柸羹項王怒欲殺之項伯曰天下事未可知且爲天下者不顧家雖殺之無益祇益禍耳項王從之項王謂漢王曰天下匈匈數歲者徒以吾兩人耳願與漢王挑戰決雌雄毋徒苦天下之民父子爲也漢王笑謝曰吾寧鬪智不能鬪力項王三令壯士出挑戰漢有善騎射者樓煩輒射殺之項王大怒乃自被甲持戟挑戰樓煩欲射之項王瞋目叱之樓煩目不敢視手不敢發遂走還入壁不敢復出漢王使人間問之乃項王也漢王大驚於是項王乃卽漢王相與臨廣武間而語羽欲與漢王獨身挑戰漢王數羽曰羽負

約王我於蜀漢罪一矯殺卿子冠軍罪二救趙不還報而擅劫諸侯兵入關罪三燒秦宮室掘始皇帝冢收私其財罪四殺秦降王子嬰罪五詐阬秦子弟新安二十萬罪六王諸將善地而徙逐故主罪七出逐義帝彭城自都之奪韓王地并王梁楚多自與罪八使人陰殺義帝江南罪九為政不平主約不信天下所不容大逆無道罪十也吾以義兵從諸侯誅殘賊使刑餘罪人擊公何苦乃與公挑戰羽大怒伏弩射中漢王漢王傷臂乃捫足曰虜中吾指漢王病創臥張良彊請漢王起行勞軍以安士卒毋令楚乘勝漢王出行軍疾甚因馳入成臯 韓信已定臨淄遂東

追齊王項王使龍且將兵號二十萬以救齊與齊王合軍

高密客或說龍且曰漢兵遠鬪窮戰其鋒不可當齊楚自居其地兵易敗散不如深壁令齊王使其信臣招所亡城亡城聞王在楚來救必反漢漢兵二千里客居齊地齊城皆反之其勢無所得食可無戰而降也龍且曰吾平生知韓信為人易與耳寄食於漂母無資身之策受辱於袴下無兼人之勇不足畏也且夫救齊不戰而降之吾何功今戰而勝之齊之半可得也十一月齊楚與漢夾濰水而陳韓信夜令人為萬餘囊滿盛沙壅水上流引軍半渡擊龍且佯不勝還走龍且果喜曰固知信怯也遂追信信使人決壅囊水大至龍且軍大半不得渡即急擊殺龍且水東軍散走齊王廣亡去信遂追北至城陽虜齊王廣漢將灌

嬰追得齊守相田光進至博陽田橫聞齊王死自立為齊
 王還擊嬰嬰敗橫軍於贏下田橫亡走梁歸彭越嬰進擊
 齊將田吸於千乘曹參擊田既於膠東皆殺之盡定齊地
 立張耳為趙王 漢王疾愈西入關至櫟陽梟故塞王欣
 頭櫟陽市留四日復如軍軍廣武 春二月遣張良操印
 立韓信為齊王徵其兵擊楚項王聞龍且死大懼使盱台
 人武涉往說齊王下信不忍倍漢遂謝蒯徹語在諸將之叛 秋八
 月漢王下令軍士不幸死者吏為衣衾棺斂轉送其家四
 方歸心焉 項王自知少助食盡韓信又進兵擊楚羽患
 之漢遣侯公說羽請太公羽乃與漢約中分天下割洪溝
 以西為漢以東為楚九月楚歸太公呂后引兵解而東歸
 漢王欲西歸張良陳平說曰漢有天下大半而諸侯皆附
 楚兵疲食盡此天下之時也今釋弗擊此謂養虎自遺患
 也漢王從之

五年冬十月漢王追項羽至固陵與齊王信魏相國越期
 會擊楚信越不至楚擊漢軍大破之漢王復堅壁自守謂
 張良曰諸侯不從柰何對曰楚兵且破二人未有分地其
 不至固宜君王能與共天下可立致也齊王信之立非君
 王意信亦不自堅彭越本定梁地始君王以魏豹故拜越
 為相國今豹死越亦望王而君王不早定今能取睢陽以
 北至穀城皆以王彭越從陳以東傳海與齊王信信家在
 楚其意欲復得故邑能出捐此地以許兩人使各自為戰

則楚易破也漢王從之於是韓信彭越皆引兵來十一月
劉賈南渡淮圍壽春遣人誘楚大司馬周殷殷畔楚以舒
屠六舉九江兵迎黥布並行屠城父隨劉賈皆會十二月
項王至垓下兵少食盡與漢戰不勝入壁漢軍及諸侯兵
圍之數重項王夜聞漢軍四面皆楚歌乃大驚曰漢皆已
得楚乎是何楚人之多也則夜起飲帳中悲歌忼慨泣數
行下左右皆泣莫能仰視於是項王乘其駿馬名騅麾下
壯士騎從者八百餘人直夜潰圍南出馳走平明漢軍乃
覺之令騎將灌嬰以五千騎追之項王渡淮騎能屬者纔
百餘人至陰陵迷失道問一田父田父給曰左左乃陷大
澤中以故漢追及之項王乃復引兵而東至東城乃有二
十八騎漢騎追者數千人項王自度不得脫謂其騎曰吾
起兵至今八歲矣身七十餘戰未嘗敗北遂霸有天下然
今卒困於此此天之亡我非戰之罪也今日固決死願為
諸君快戰必潰圍斬將刈旗三勝之令諸君知天亡我非
戰之罪也乃分其騎以為四隊四鄉漢軍圍之數重項王
謂其騎曰吾為公取彼一將令四面騎馳下期山東為三
處於是項王大呼馳下漢軍皆披靡遂斬漢一將是時郎
中騎楊喜追項王項王瞋目而叱之喜人馬俱驚辟易數
里項王與其騎會為三處漢軍不知項王所在乃分軍為
三復圍之項王乃馳復斬漢二都尉殺數十百人復聚其
騎亡其兩騎耳乃謂其騎曰何如騎皆伏曰如大王言於

是項王欲東渡烏江烏江亭長檣船待謂項王曰江東雖小地方千里衆數十萬人亦足王也願大王急渡今獨臣有船漢軍至無以渡項王笑曰天之亡我我何渡爲且籍與江東子弟八千人渡江而西今無一人還縱江東父兄憐而王我我何面目見之縱彼不言籍獨不愧於心乎乃以其所乘騅馬賜亭長令其皆下馬步行持短兵接戰獨籍所殺漢軍數百人身亦被十餘創顧見漢騎司馬呂馬童曰若非吾故人乎馬童面之指示中郎騎王翳曰此項王也項王乃曰吾聞漢購我頭千金邑萬戶吾爲若德乃刎而死王翳取其頭餘騎相蹂踐爭項王相殺者數十人

最其後楊喜呂馬童及郎中呂勝楊武各得其一體五人共會其體皆是故分其尸封五人皆爲列侯楚地悉定獨魯不下漢王引天下兵欲屠之至其城下猶聞絃誦之聲爲其守禮義之國爲主死節乃持項王頭以示魯父兄魯乃降漢王以魯公禮葬項王於穀城親爲發哀哭之而去諸項氏枝屬皆不誅封項伯等四人皆爲列侯賜姓劉氏諸民略在楚者皆歸之 太史公曰羽起隴晦之中三年遂將五諸侯滅秦分裂天下而封王侯政由羽出位雖不終近古以來未嘗有也及羽背關懷楚放逐義帝而自立怨王侯叛已難矣自矜功伐奮其私智而不師古謂霸王之業欲以力征經營天下五年卒亡其國身死東城尚不覺寤而不自責乃引天亡我非用兵之罪也豈不謬哉

楊子法言或問楚敗垓下方死曰天也諒乎曰漢屈羣策羣策屈羣力楚傲羣策而自屈其力屈人者克自屈者負天曷故焉 春正月諸侯王皆上疏請尊漢王爲皇帝二月甲午王卽皇帝位于汜水之陽 帝西都洛陽 夏五月帝置酒洛陽南宮上曰徹侯諸將毋敢隱朕皆言其情吾所以有天下者何項氏之所以失天下者何高起王陵對曰陛下使人攻城略地因以與之與天下同其利項羽不然有功者受不足之賢者疑之此其所以失天下也上曰公知其一未知其二夫運籌帷幄之中決勝千里之外吾不知子房鎮國家撫百姓給餉餽不絕糧道吾不如蕭何連百萬之衆戰必勝攻必取吾不如韓信三者皆人傑吾能用之此吾所以取天下者也項羽有一范增而不能用此所以爲我禽也羣臣說服 齊人婁敬戍隴西過洛陽脫輓輅衣羊裘因齊人虞將軍求見上虞將軍欲與之鮮衣婁敬曰臣衣帛衣帛見衣褐衣褐見終不敢易衣於是虞將軍入言上上召見問之婁敬曰陛下都洛陽豈欲與周室比隆哉上曰然婁敬曰陛下取天下與周異周之先自后稷封郃積德素善于有餘世至于太王王季文王武王而諸侯自歸之遂滅殷爲天子及成王卽位周公相焉乃營洛邑以爲此天下之中也諸侯四方納貢職道理均矣有德則易以王無德則易以亡故周之盛時天下和洽諸侯四夷莫不賓服効其貢職及其衰也天下莫朝周不能

制也非唯其德薄也形勢弱也今陛下起豐沛卷蜀漢定三秦與項羽戰滎陽成臯之間大戰七十小戰四十使天下之民肝腦塗地父子暴骨中野不可勝數哭泣之聲未絕傷夷者未起而欲比隆於成康之時臣竊以為不侔也且夫秦地被山帶河四塞以為固卒然有急百萬之眾可立具也因秦之故資其美膏腴之地此所謂天府者也陛下入關而都之山東雖亂秦之故地可全而有也夫與人鬪不掩其亢拊其背未能全其勝也今陛下案秦之故地此亦掩天下之亢而拊其背也帝問羣臣羣臣皆山東人爭言周王數百年秦二世即亡洛陽東有成臯西有殽澠音可鄭尹各其固亦定時也上問張良良曰洛陽雖有此固其中小不過數百里田地薄四面受敵此非用武之國也關中左殽函右隴蜀沃野千里南有巴蜀之饒北有胡苑之利阻三面而守獨以一面東制諸侯諸侯安定河渭漕輓天下西給京師諸侯有變順流而下足以委輸此所謂金城千里天府之國也婁敬說是也上即日車駕西都長安拜婁敬為郎中號曰奉春君賜姓劉氏

諸將之叛

漢高祖四年冬十月韓信襲齊已定臨淄遂東追齊王項王使龍且將兵救齊信擊殺龍且虜齊王廣韓信使人言漢王曰齊偽詐多變反覆之國也南邊楚請為假王以鎮之漢王發書大怒罵曰吾困於此且暮望君來佐我乃欲

自立為王張良陳平躡漢王足因附耳語曰漢方不利寧能禁信之自王乎不如因而立之善遇使自為守不然變生漢王亦悟因復罵曰大丈夫定諸侯即為真王耳何以假為春二月遣張良操印立韓信為齊王徵其兵擊楚項王聞龍且死大懼使盱台人武涉往說齊王信曰天下共苦秦久矣相與戮力擊秦秦已破計功割地分土而王之以休士卒今漢王復興兵而東侵人之分奪人之地已破三秦引兵出關收諸侯之兵以東擊楚其意非盡吞天下者不休其不知厭足如是甚也且漢王不可必身居項王掌握中數矣項王憐而活之然得脫輒倍約復擊項王其不可親信如此今足下雖自以與漢王為厚交為之盡力用兵必終為所禽矣足下所以得須臾至今日者以項王尚存也當今二王之事權在足下足下右投則漢王勝左投則項王勝項王今日亡則次取足下足下與項王有故何不反漢與楚連和三分天下王之今釋此時而自必於漢以擊楚且為智者固若此乎韓信謝曰臣事項王官不過郎中位不過執戟言不聽畫不用故倍楚而歸漢漢王授我上將軍印予我數萬眾解衣衣我推食食我言聽計用故吾得以至於此夫人深親信我我倍之不祥雖死不易幸為信謝項王武涉已去蒯徹知天下權在信乃以相人之術說信曰僕相君之面不過封侯又危不安相君之背貴乃不可言韓信曰何謂也蒯徹曰天下初發難也

憂在亡秦而已今楚漢分爭使天下之人肝膽塗地父子
暴骸骨於中野不可勝數楚人越彭城轉關逐北乘利席
卷威震天下然兵困於京索之間迫西山而不能進者三
年於此矣漢王將數十萬之衆距鞏雒阻山河之險一日
數戰無尺寸之功折北不救此所謂智勇俱困者也百姓
罷極怨望無所歸倚以臣料之其勢非天下之賢聖固不
能息天下之禍當今兩主之命懸於足下足下爲漢則漢
勝與楚則楚勝誠能聽臣之計莫若兩利而俱存之參分
天下鼎足而居其勢莫敢先動夫以足下之賢聖有甲兵
之衆據疆齊從燕趙出空虛之地而制其後因民之欲西
疆以立諸侯諸侯已立天下服聽而歸德於齊案齊之故
有膠泗之地深拱揖讓則天下之君王相率而朝於齊矣
蓋聞天與弗取反受其咎時至不行反受其殃願足下熟
慮之韓信曰漢王遇我甚厚吾豈可以鄉利而倍義乎蒯
生曰始常山王成安君爲布衣時相與爲刎頸之交後爭
張鱗陳澤之事常山王殺成安君泚水之南頭足異處此
二人相與天下至驩也然而卒相禽者何也患生於多欲
而人心難測也今足下欲行忠信以交於漢王必不能固
於二君之相與也而事多大於張鱗陳澤者故臣以爲足
下必漢王之不危已亦誤矣大夫種存亡越霸句踐立功
成名而身死亡野獸已盡而獵狗烹夫以交友言之則不

如張耳之與成安君者也以忠信言之則不過大夫種之於句踐也此二者足以觀矣願足下深慮之且臣聞勇略震主者身危功蓋天下者不賞今足下戴震主之威挾不賞之功歸楚楚人不信歸漢漢人震恐足下欲持是安歸乎韓信謝曰先生且休矣吾將念之後數日蒯徹復說曰夫聽者事之候也計者事之機也聽過計失而能久安者鮮矣故知者決之斷也疑者事之害也審毫釐之小計遺天下之大數智誠知之決不敢行者百事之禍也夫功者難成而易敗時者難得而易失也時乎時不再來韓信猶豫不忍倍漢又自以為功多漢終不奪我齊遂謝蒯徹因去去往往為為巫

五年冬十月漢王追項羽至固陵與韓信彭越期會擊楚信越不至漢王用張良計分地以王二人事見高帝滅楚十二月

漢王還至定陶馳入齊王信壁奪其軍 春正月更立齊王信為楚王王淮北郡下邳封魏相國建城侯彭越為梁王王魏故地都定陶

六年冬十月人有上書告楚王信反者帝以問諸將皆曰亟發兵坑豎子耳帝默然又問陳平陳平曰人上書言信反信知之乎曰不知陳平曰陛下精兵孰與楚上曰不能過平曰陛下諸將用兵有能過韓信者乎上曰莫及也平曰今兵不如楚精而將不能及舉兵攻之是趣之戰也竊為陛下危之上曰為之柰何平曰古者天子有巡狩會諸

侯陛下第出爲游雲夢會諸侯於陳陳楚之西界信聞天子以好出游其執必無事而郊迎謁謁而陛下因禽之此特一力士之事耳帝以爲然乃發使告諸侯會陳吾將南游雲夢上因隨以行楚王信聞之自疑懼不知所爲或說信曰斬鍾離昧以謁上上必喜無患信從之十二月上會諸侯於陳信持昧首謁上上令武士縛信載後車信曰果若人言狡兔死走狗烹高鳥盡良弓藏敵國破謀臣亡天下已定我固當烹上曰人告公反遂械繫信以歸因赦天下田肯賀上曰陛下得韓信又治秦中秦形勝之國也帶河阻山地執便利其以下兵於諸侯譬猶居高屋之上建瓴水也夫齊東有琅邪即墨之饒南有泰山之固西有蜀河之限北有勃海之利地方二千里持戟百萬此東西秦也非親子弟莫可使王齊者上曰善賜金五百斤上還至洛陽赦韓信封爲淮陰侯信知漢王畏惡其能多稱病不朝從居常鞅鞅羞與絳灌等列嘗過樊將軍噲噲跪拜送迎言稱臣曰大王乃肯臨臣信出門笑曰生乃與噲等爲伍上嘗從容與信言諸將能將兵多少上問曰如我能將幾何信曰陛下不過能將十萬上曰於君何如曰臣多多而益善耳上笑曰多多益善何爲爲我禽信曰陛下不能將兵而善將將此乃信之所以爲陛下禽也且陛下所謂天授非人力也

十年 初上以陽夏侯陳豨爲相國監趙代邊兵豨過辭

淮陰侯淮陰侯挈其手辟左右與之步於庭仰天嘆曰子
 可與言乎稀曰唯將軍令之淮陰侯曰公之所居天下精
 兵處也而公陛下之信幸臣也人言公之畔陛下必不信
 再至陛下乃疑矣三至必怒而自將吾為公從中起天下
 可圖也陳稀素知其能也信之曰謹奉教稀常慕魏無忌
 之養士及為相守邊告歸過趙賓客隨之者千餘乘邯鄲
 官舍皆滿趙相周昌求入見上具言稀賓客甚盛擅兵於
 外數歲恐有變上令人覆案稀密居代者諸不法事多連
 引稀稀恐韓王信因使王黃曼丘臣等說誘之太上皇崩
 上使人召稀稀稱病不至九月遂與王黃等反自立為代
 王劫略趙代上自東擊之至邯鄲喜曰稀不南據邯鄲而
 阻漳水吾知其無能為矣周昌曰秦常山二十五城亡其二
 十城請誅守尉上曰守尉反乎對曰不上曰是力不足亡
 罪上令周昌選趙壯士可令將者白見四人上嫚罵曰豎
 子能為將乎四人慙皆伏地上封各千戶以為將左右諫
 曰從入蜀漢伐楚賞未徧行今封此何功上曰非汝所知
 陳稀反趙代地皆稀有吾以羽檄徵天下兵未有至者今
 計唯獨邯鄲中兵耳吾何愛四千戶不以慰趙子弟皆曰
 善又聞稀將皆故賈人上曰吾知所以與之矣乃多以金
 購稀將稀將多降

十一年冬上在邯鄲陳稀將侯敞將萬餘人游行王黃將
 騎千餘軍曲逆張春將卒萬餘人渡河攻聊城漢將軍郭

蒙與齊將擊大破之太尉周勃道太原入定代地至馬邑
不下攻殘之趙利守東垣帝攻拔之更命曰真定帝購王
黃曼丘臣以千金其麾下皆生致之於是陳豨軍遂敗淮
陰侯信稱病不從擊豨陰使人至豨所與通謀信謀與家
臣夜詐詔赦諸官徒奴欲發以襲呂后太子部署已定待
豨報其舍人得罪於信信囚欲殺之 春正月舍人弟上
變告信欲反狀於呂后呂后欲召恐其黨不就乃與蕭相
國謀詐令人從上所來言豨已得死列侯羣臣皆賀相國
給信曰雖疾彊入賀信入呂后使武士縛信斬之長樂鍾
室信方斬曰吾悔不用蒯徹之計乃爲兒女子所詐豈非

天哉遂夷信三族

臣光曰世或以韓信爲首建大策與高祖起漢中定三秦
遂分兵以北禽魏取代什趙脅燕東擊齊而有之南滅楚
垓下漢之所以得天下者大抵皆信之功也觀其距蒯徹
之說迎高祖於陳豈有反心哉良由失職怏怏遂陷悖逆
夫以盧綰里閤舊員猶南面王燕信乃以列侯奉朝請豈
非高祖亦有負於信哉臣以爲高祖用詐謀禽信於陳言
負則有之雖然信亦有以取之也始漢以楚相距滎陽信
滅齊不還報以自王其後漢追楚至固陵與信期共攻楚
而信不至當是之時高祖固有取信之心矣顧力不能耳
及天下已定則信復何恃哉夫乘時以徼利者市井之志
也躋功而報德者士君子之心也信以市井之志利其身

而之士君子之心望於人不亦難哉是故太史公論之曰
 假令韓信學道謙讓不伐已功不矜其能則庶幾哉於漢
 家勲可以比周召太公之徒後世血食矣不務出此而天
 下以集乃謀畔逆夷滅宗族不亦宜乎 上還洛陽聞淮
 陰侯之死且喜且憐之問呂后曰信死亦何言呂后曰信
 言恨不用蒯徹計上曰是齊辯士蒯徹也乃詔齊捕蒯徹
 蒯徹至上曰若教淮陰侯反乎對曰然臣固教之豎子不
 用臣之策故令自夷於此如用臣之計陛下安得而夷之
 乎上怒曰烹之徹曰嗟乎冤哉烹也上曰若教韓信反何
 冤對曰秦失其鹿天下共逐之高材疾足者先得焉跖之
 向犬堯堯非不仁狗固吠非其主當是時臣唯獨知韓信
 非知陛下也且天下銳精持鋒欲為陛下所為者甚眾顧
 力不能耳又可盡烹之邪上曰置之 上之擊陳豨也徵
 兵於梁梁王稱病使將將兵詣邯鄲上怒使人讓之梁王
 恐欲自往謝其將扈轍曰王始不往見讓而往往則為禽
 矣不如遂發兵反梁王不聽梁太僕得罪亡走漢告梁王
 與扈轍謀反於是上使使掩梁王梁王不覺遂囚之洛陽
 有司治反形已具請論如法上赦以為庶人傳處蜀青衣
 西至鄭逢呂后從長安來彭王為呂后泣涕自言無罪願
 處故昌邑呂后許諾與俱東至洛陽呂后白上曰彭王壯
 士今徙之蜀此自遺患不如遂誅之妾謹與俱來於是呂
 后乃令其舍人告彭越復謀反廷尉王恬開奏請族之上

可其奏三月夷越三族梟越首洛陽下詔有收視者輒捕之梁大夫欒布使於齊還奏事越頭下祠而哭之吏捕以聞上召布罵欲烹之方提趨湯布顧曰願一言而死上曰何言布曰方上之困於彭城敗滎陽成臯間項王所以遂不能西者徒以彭王居梁地與漢合從苦楚也當是之時王一顧與楚則漢破與漢而楚破且垓下之會微彭王項氏不亡天下已定彭王剖符受封亦欲傳之萬世今陛下南王布反初淮陰侯死布已心恐及彭越誅醢其肉以賜諸侯使者至淮南淮南王方獵見醢因大恐陰令人部聚一徵兵於梁彭王病不行而陛下疑以爲反反形未具以苛小案誅滅之臣恐功臣人人自危也今彭王已死臣生不如死請就烹於是上乃釋布罪拜爲都尉 秋七月淮

兵候伺旁郡警急布所幸姬病就醫醫家與中大夫賁赫對門赫乃厚餽遺從姬飲醫家王疑其與亂欲捕赫赫乘傳詣長安上變言布謀反有端可見未發露也上讀其書語蕭相國相國曰布不宜有此恐讎怨妄誣之請繫赫使人微驗淮南王淮南王布見赫以罪亡上變固已疑其言國陰事漢使又來頗有所驗遂族赫家發兵反反書聞上乃赦賁赫以爲將軍上召諸將問計皆曰發兵擊之坑豎子耳何能爲乎汝陰侯滕公召故楚令尹薛公問之令尹曰是固當反滕公曰上裂地而封之疏爵而王之其反何也令尹曰往年殺彭越前年殺韓信此三人者同功一體

之人也自疑禍及身故反耳滕公言之上上乃召見問薛公薛公對曰布反不足恠也使布出於上計山東非漢之有也出於中計勝敗之數未可知也出於下計陛下安枕而臥矣上曰何謂上計對曰東取吳西取楚并齊取魯傳檄燕趙固守其所山東非漢之有也何謂中計東取吳西取楚并韓取魏據敖倉之粟塞成臯之口勝敗之數未可知也何謂下計東取吳西取下蔡歸重於越身歸長沙陛下安枕而臥漢無事矣上曰是計將安出對曰出下計上曰何謂廢上中計而出下計對曰布故麗山之徒也自致萬乘之主此皆爲身不顧後爲百姓萬世慮者也故曰出

下計上曰善對薛公千戶乃立皇子長爲淮南王是時上有疾欲使太子往擊黥布布使客東園公綺里季夏黃公

角里先生說建成侯呂釋之曰太子將兵有功則位不益無功則從此受禍矣君何不急請呂后承間爲上泣言黥布天下猛將也善用兵今諸將皆陛下故等夷乃令太子將此屬無異使羊將狼莫肯爲用且使布聞之則鼓行而西耳上雖病彊載輜車臥而護之諸將不敢不盡力上雖苦爲妻子自彊於是呂釋之立夜見呂后呂后承間爲上泣涕而言如四人意上曰吾惟豎子固不足遣而公自行耳於是上自將兵而東羣臣居守皆送至霸上留侯病自彊起至曲郵見上曰臣宜從病甚楚人剽疾願上無與爭鋒因說上令太子爲將軍監關中兵上曰子房雖病彊臥

而傳太子是時叔孫通為大傅留侯行少傅事發上郡北地隴西車騎巴蜀材官及中尉卒三萬人為皇太子衛軍霸上布之初反謂其將曰上老矣厭兵必不能來使諸將諸將獨患淮陰彭越今皆已死餘不足畏也故遂反果如薛公之言東擊荊荆王賈走死富陵盡劫其兵渡淮擊楚楚發兵與戰徐僮間為三軍欲以相救為奇或說楚將曰布善用兵民素畏之且兵法諸侯自戰其地為散地今別為三彼敗吾一軍餘皆走安能相救不聽布果破其一軍其二軍散走布遂引兵而西

十二年冬十月上與布兵遇於蘄西布兵精甚上壁庸城望布軍置陳如項籍軍上惡之與布相望見遙謂布曰何苦而反布曰欲為帝耳上怒罵之遂大戰布軍敗走渡淮數止戰不利與百餘人走江南上令別將追之漢別將擊英布軍洮水南比皆大破之布故與番君婚以故長沙成王臣使人誘布偽欲與亡走越布信而隨之番陽人殺布茲鄉民田舍周勃悉定代郡鴈門雲中地斬陳豨於當城陳豨之反也燕王綰發兵擊其東北當是時陳豨使王黃求救匈奴燕王綰亦使其臣張勝於匈奴言豨等軍破張勝至胡故燕王臧荼子衍出亡在胡見張勝曰公所以重於燕者以習胡事也燕所以久存者以諸侯數反兵連不決也今公為燕欲急滅豨等豨等已盡次亦至燕公等亦且為虜矣公何不令燕且緩陳豨而與胡和事寬

得長王燕即有漢急可以安國張勝以為然乃私令匈奴助豨等擊燕燕王縮疑張勝與胡反上書請族張勝勝還具道所以為者燕王乃詐論他人脫勝家屬使得為匈奴間而陰使范齊之陳豨所欲令久亡連兵勿決漢擊黥布豨常將兵居代漢擊斬豨其裨將降言燕王縮使范齊通計謀於豨所帝使使召盧縮縮稱病上又使辟陽侯審食其御史大夫趙堯往迎燕王因驗問左右縮愈恐閉匿謂其幸臣曰非劉氏而王獨我與長沙耳往年春漢族淮陰夏誅彭越皆呂氏計今上病屬任呂后呂后婦人專欲以事誅異姓王者及大功臣乃遂稱病不行其左右皆亡匿

語類世辟陽侯聞之歸具報上上益怒又得匈奴降者言張勝亡在匈奴為燕使於是上曰盧縮果反矣春二月使

樊噲以相國將兵擊縮立皇子建為燕王 盧縮與數千

人居塞下候伺幸上疾愈自入謝聞帝崩遂亡入匈奴

匈奴和親

漢高祖六年 初匈奴畏秦北徙十餘年及秦滅匈奴復稍南度河單于頭曼有太子曰冒頓後有所愛閼氏生少子頭曼欲立之是時東胡疆而月氏盛乃使冒頓質於月氏既而頭曼急擊月氏月氏欲殺冒頓冒頓盜其善馬騎之亡歸頭曼以為壯令將萬騎冒頓乃作鳴鏑習勒其騎射今日鳴鏑所射而不悉射者斬之冒頓乃以鳴鏑自射其善馬既又射其愛妻左右或不敢射者皆斬之最後以

鳴鏑射單于善馬左右皆射之於是冒頓知其可用從頭
曼獵以鳴鏑射頭曼其左右亦皆隨鳴鏑而射遂殺頭曼
盡誅其後母與弟及大臣不聽從者冒頓自立為單于東
胡聞冒頓立乃使使謂冒頓欲得頭曼時千里馬冒頓問
羣臣羣臣皆曰此匈奴寶馬也勿與冒頓曰柰何與人鄰
國而愛一馬乎遂與之居頃之東胡又使使謂冒頓欲得
單于一闕氏冒頓復問左右左右皆怒曰東胡無道乃求
闕氏請擊之冒頓曰柰何與人鄰國愛一女子乎遂取所
愛闕氏子東胡東胡王愈益驕東胡與匈奴中間有棄地
莫居千餘里各居其邊為甌脫東胡使使謂冒頓此棄地
欲有之冒頓問羣臣羣臣皆曰此棄地予之亦可勿與亦
可於是冒頓大怒曰地者國之本也柰何予之諸言予之
者皆斬之冒頓上馬令國中有後出者斬遂襲擊東胡東
胡初輕冒頓不為備冒頓遂滅東胡既歸又西擊走月氏
南并樓煩白羊河南王遂侵燕代悉復收蒙恬所奪匈奴
故地與漢關故河南塞至朝那膚施是時漢兵方與項羽
相距中國罷於兵革以故冒頓得自彊控弦之士三十餘
萬威服諸國秋匈奴圍韓王信於馬邑信數使使胡求和
解漢發兵救之疑信數間使有二心使人責讓信信恐誅
九月以馬邑降匈奴匈奴冒頓因引兵南踰句注攻太原
至晉陽

七年冬十月上自將擊韓王信破其軍於銅鞮斬其將王

喜信亡走匈奴白土人曼丘臣王黃等立趙苗裔趙利為王復收信敗散兵與信及匈奴謀攻漢匈奴使左右賢王將萬餘騎與王黃等屯廣武以南至晉陽漢兵擊之匈奴輒敗走已復屯聚漢兵乘勝追之會天大寒雨雪士卒墮指者什二三上居晉陽聞昌頓居代谷欲擊之使人覘匈奴昌頓匿其壯士肥牛馬但見老弱及羸畜使者十輩來皆言匈奴可擊上復使劉敬往使匈奴未還漢悉兵三十二萬北逐之踰句注劉敬還報曰兩國相擊此宜夸矜見所長今臣往徒見羸瘠老弱此必欲見短伏竒兵以爭利愚以為匈奴不可擊也是時漢兵已業行上怒罵劉敬曰齊虜以口舌得官今乃妄言沮吾軍誠擊敬廣武帝先至平城兵未盡到昌頓縱精兵四十萬騎圍帝於白登七日漢兵中外不得相救餉帝用陳平秘計使使間厚遺閼氏閼氏謂昌頓曰兩主不相困今得漢地而單于終非能居之也且漢主亦有神靈單于察之昌頓與王黃趙利期而黃利兵不來疑其與漢有謀乃解圍之一角會天大霧漢使人往來匈奴不覺陳平請令彊弩傳兩矢外鄉從解角直出帝出圍欲驅大僕滕公固徐行至平城漢大軍亦到胡騎遂解去漢亦罷兵歸令樊噲止定代地上至廣武赦劉敬曰吾不用公言以困平城吾皆已斬前使十輩矣乃封敬二十戶為關內侯號為建信侯帝南過曲逆曰壯哉縣吾行天下獨見洛陽與是耳乃更封陳平為曲逆侯盡

食之平從帝征伐凡六出奇計輒益封邑焉 十二月匈奴攻代代王喜棄國自歸赦為郃陽侯

八年匈奴冒頓數苦北邊上患之問劉敬劉敬曰天下初定士卒罷於兵未可以武服也冒頓殺父代立妻羣母以力為威未可以仁義說也獨可以計久遠子孫為臣耳然恐陛下不能為上曰柰何對曰陛下誠能以適長公主妻之厚奉遺之彼必慕以為闕氏生子必為太子陛下以歲時漢所餘彼所鮮數問遺因使辯士風諭以禮節冒頓在固為子婿死則外孫為單于豈嘗聞外孫敢與大父抗禮者哉可無戰以漸臣也若陛下不能遣長公主而令宗室及後宮詐稱公主彼不肯貴近無益也帝曰善欲遣長公主呂后日夜泣曰妾唯太子一女柰何棄之匈奴上竟不能遣

九年冬上取家人子名為長公主以妻單于使劉敬往結和親約

臣光曰建信侯謂冒頓殘賊不可以仁義說而欲與為婚姻何前後之相違也夫骨肉之恩尊卑之敘唯仁義之人為能知之柰何欲以此服冒頓哉蓋上世帝王之御夷狄也服則懷之以德叛則震之以威未聞與為婚姻且冒頓視其父如禽獸而獵之奚有於婦翁建信侯之術固已踈矣况魯元已為趙后又可奪乎

惠帝三年春以宗室女為公主嫁匈奴冒頓單于是時冒

頓方疆為書使使遺高后辭極褻嫚高后大怒召將相大臣議斬其使者發兵擊之樊噲曰臣願得十萬眾橫行匈奴中中郎將季布曰噲可斬也前匈奴圍高帝於平城漢兵三十二萬噲為上將軍不能解圍今歌吟之聲未絕傷夷者甫起而噲欲搖動天下妄言以十萬眾橫行是面謾也且夷狄譬如禽獸得其善言不足喜惡言不足怒也高后曰善令大謁者張釋報書深自謙遜以謝之并遺以車二乘馬二駟冒頓復使使來謝曰未嘗聞中國禮義陛下幸而赦之因獻馬遂和親

高后六年四月匈奴寇狄道攻阿陽

七年冬十二月匈奴寇狄道略二千餘人

文帝前三年五月匈奴右賢王入居河南地侵盜上郡保

塞蠻夷殺略人民上幸甘泉遣丞相灌嬰發車騎八萬五千詣高奴擊右賢王發中尉材官屬衛將軍軍長安右賢王走出塞

六年冬十月匈奴單于遺漢書曰前時皇帝言和親事稱書意合歡漢邊吏侵侮右賢王右賢王不請聽後義盧侯難支等計與漢吏相距絕二主之約離兄弟之親故罰右賢王使之西求月氏擊之以天之福吏卒良馬力強以夷滅月氏盡斬殺降下定之樓蘭鳴孫呼揭及其旁二十六國皆已為匈奴諸引弓之民并為一家北州已定願寢兵休士卒養馬除前事復故約以安邊民皇帝即不欲匈奴

近塞則且詔吏民遠舍帝報書曰單于欲除前事復故約
朕甚嘉之此古聖王之志也漢與匈奴約為兄弟所以遺
單于甚厚倍約離兄弟之親者常在匈奴然右賢王事已
在赦前單于勿深誅單于若稱書意明告諸吏使無負約
有信敬如單于書後項之昌頓死子稽粥立號曰老上單
于老上單于初立帝復遣宗室女翁主為單于闕氏使宦
者燕人中行說傳翁主說不欲行漢強使之說曰必我也
為漢患者中行說既至因降單于單于甚親幸之初匈奴
好漢繪絮食物中行說曰匈奴人衆不能當漢之一郡然
所以強者以衣食異無仰於漢也今單于變俗好漢物漢
物不過什二則匈奴盡歸於漢矣其得漢繪絮以馳草棘
中衣袴皆裂敝以示不如旃裘之完善也得漢食物皆去
之以示不如湏酪之便美也於是說教單于左右疏記以
計課其人衆畜牧其遺漢書牘及印封皆令長大倨傲其
辭自稱天地所生日月所置匈奴大單于漢使或嘗咲匈
奴俗無禮義者中行說輒窮漢使曰匈奴約束徑易行君
臣簡可久一國之政猶一體也故匈奴雖亂必立宗種今
中國雖云有禮義及親屬益踈則相殺奪以至易姓皆從
此類也嗟土室之人顧無多辭喋喋佔佔顧漢所輸匈奴
繪絮米穀令其量中必善美而已矣何以言為乎且所給
備善則已不備苦惡則候秋熟以騎馳蹂而稼穡耳梁
太傅賈誼上疏曰天下之執方倒縣凡天子者天下之首

何也上也蠻夷者天下之足可也下也今匈奴嫚侮侵掠至不敬也而漢歲致金絮來繒以奉之足反居上首顧居下倒縣如此莫之能解猶為國有人乎可為流涕者此也今不獵猛敵而獵田兔不博反寇而博畜菟翫細娛而不圖大患德可遠加而直數百里外威令不伸可為流涕者此也

十一年冬十一月匈奴寇狄道時匈奴數為邊患太子家令潁川鼂錯上言兵事曰兵法曰有必勝之將無必勝之民繇此觀之安邊境立功名在於良將不可不擇也臣又聞用兵臨戰合刃之急者三一日得地形二曰卒服習三

曰器用利兵法步兵車騎弓弩長戟矛鉞劍楯之地各有所宜不得其宜者或不十不當一士不選練卒不服習起居

不精動靜不集趨利弗及避難不畢前擊後解與金鼓之指相失此不習勒卒之過也百不當十兵不完利與空手同甲不堅密與袒裼同弩不可以及遠與短兵同射不能中與無矢同中不能入與無鏃同此將不省兵之禍也五不當一故兵法曰器械不利以其卒予敵也卒不可用以其將予敵也將不知兵以其主予敵也君不擇將以其國予敵也四者兵之至要也臣又聞小大異形疆弱異執險易異備夫卑身以事疆小國之形也合小以攻大敵國之形也以蠻夷攻蠻夷中國之形也今匈奴地形技藝與中國異上下山阪出入溪澗中國之馬弗與也險道傾反且

馳且射中國之騎弗與也風雨罷勞飢渴不困中國之人
 弗與也此匈奴之長技也若夫平原易地輕車突騎則匈
 奴之衆易撓亂也勁弩長戟射疏及遠則匈奴之弓弗能
 格也堅甲利刃長短相雜遊弩往來什伍俱前則匈奴之
 兵弗能當也材官騶發矢道同的則匈奴之革筈木薦弗
 能支也下馬地關劔戟相接去就相薄則匈奴之足弗能
 給也此中國之長技也以此觀之匈奴之長技三中國之
 長技五陛下又興數十萬之衆以誅數萬之匈奴衆寡之
 計以一擊十之術也雖然兵凶器戰危事也故以大爲小
 以彊爲弱在俛仰之間耳夫以人之死爭勝跌而不振則
 悔之無及也帝王之道出於萬全今降胡義渠蠻夷之屬
 來歸誼者其衆數千飲食長技與匈奴同可賜之堅甲

衣勁弓利矢益以邊郡之良騎令明將能知其習俗和輯
 其心者以陛下之明約將之卽有險阻以此當之平地通
 道則以輕車材官制之兩軍相爲表裏各用其長技衡加
 之以衆此萬全之術也帝嘉之賜錯書寵答焉錯又上言
 曰臣聞秦起兵而攻胡粵者非以衛邊地而救民死也貪
 戾而欲廣大也故功未立而天下亂且夫起兵而不知其
 執戰則爲人禽屯則卒積死夫胡貉之人其性耐寒揚粵
 之人其性耐暑秦之戍卒不耐其水土戍者死於邊輸者
 償於道秦民見行如往棄市因以謫發之名曰謫戍先發
 吏有謫及贅壻賈人後以嘗有市籍者又後以大父母父

毋嘗有市籍者後入閭取其左發之不順行者憤怨有萬死之害而亡銖兩之報死事之後不得一筭之復天下明知禍烈及已也陳勝行戍至於大澤爲天下先倡天下從之如流水者秦以威劫而行之之敝也胡人衣食之業不著於地其執易以擾亂邊境往來轉徙時至時去此胡人之生業而中國之所以離南晦也今胡人數轉牧行獵於塞下以候備塞之卒卒少則入陛下不救則邊民絕望而有降敵之心救之少發則不足多發遠縣纔至則胡又已去聚而不罷爲費甚大罷之則胡復入如此連年則中國貧苦而民不安矣陛下幸邊境遣將吏發卒以治塞甚大惠也然令遠方之卒守塞一歲而更不知胡人之能不如選常居者家室田作且以備之以便爲之高城深塹要害之處通川之道調立城邑毋下千家先爲室屋具田器乃募民免罪拜爵復其家予冬夏衣稟食能自給而止塞下之民祿利不厚不可使久居危難之地胡人入驅而能止其所驅者以其半予之縣官爲贖其民如是則邑里相救助赴胡不避死非以德上也欲全親戚而利其財也此與東方之戍卒不習地執而心畏胡者功相萬也以陛下之時徙民實邊使遠方無屯戍之事塞下之民父子相保無係虜之患利施後世名稱聖明其與秦之行怨民相去遠矣上從其言募民徙塞下錯復言陛下幸募民徙以實塞下使屯戍之事益省輸將之費益寡其大惠也下吏誠

能稱厚惠奉明法存卹所徙之老弱善遇其壯士和輯其
心而勿侵刻使先至者安樂而不思故鄉則貧民相慕而
勸往矣臣聞古之徙民者相其陰陽之和宜其水泉之味
然後營邑立城製里割宅先爲築室家置器物焉民至有
所居作有所用此民所以輕去故鄉而勸之新邑也爲置
醫巫以救疾病以脩祭祀男女有昏生死相卹墳墓相從
種樹畜長室屋完安此所以使民樂其處而有長居之心
也臣又聞古之制邊縣以備敵也使五家爲伍伍有長十
長一里里有假士四里一連連有假五百十連一邑邑有
假候皆擇其邑之賢材有護習地形知民心者居則習民
於射法出則教民於應敵故卒伍成於內則軍政定於外
以成勿令遷徙幼則同遊長則共事夜戰聲相知則足以
相救晝戰目相見則足以相識驩愛之心足以相死如此
而勸以厚賞威以重罰則前死不還踵矣所徙之民非壯
有材者但費衣糧不可用也未有材力不得良吏猶亡功
也陛下絕匈奴不與和親臣竊意其冬來南也壹大治則
終身劊矣欲立威者始於折膠來而不能因使得氣去後
未易服也

十四年冬匈奴老上單于十四萬騎入朝那蕭關殺北地
都尉卽虜人民畜產甚多遂至彭陽使奇兵入燒回中宮
候騎至雍甘泉帝以中尉周舍郎中令張武爲將軍發車
千乘騎卒十萬軍長安旁以備胡寇而拜昌侯盧卿爲上

郡將軍甯侯魏遼為北地將軍隆慮侯周竈為隴西將軍屯三郡上親勞軍勒兵申教令賜吏卒自欲征匈奴羣臣諫不聽皇太后固要上乃止於是東陽侯張相如為大將軍成侯董赤內史欒布皆為將軍擊匈奴單于留塞內月餘乃去漢逐出塞即還不能有所殺

後二年匈奴連歲入邊殺略人民畜產甚多雲中遼東最甚郡萬餘人上患之乃使使遺匈奴書單于亦使當戶報謝復與匈奴和親

三年匈奴老上單于死子軍臣單于立

六年冬匈奴三萬騎入上郡三萬騎入雲中所殺略甚眾降火通於甘泉長安以中大夫令免為車騎將軍屯飛狐

故楚相蘇意為將軍屯句注將軍張武屯北地河內太守周亞夫為將軍次細柳宗正劉禮為將軍次霸上祝茲侯

徐厲為將軍次棘門以備胡上自勞軍至霸上及棘門軍直馳入將以下俱送迎已而之細柳軍軍士吏被甲銳兵

刃彀弓弩持滿天子先驅至不得入先驅曰天子且至軍門都尉曰將軍令曰軍中聞將軍令不聞天子之詔居無

何上至又不得入於是上乃使使持節詔將軍吾欲入營勞軍亞夫乃傳言開壁門壁門士請車騎曰將軍約軍中

不得驅馳於是天子乃按轡徐行至營將軍亞夫持兵揖曰介冑之士不拜請以軍禮見天子為動改容式車使人

稱謝皇帝敬勞將軍成禮而去既出軍門羣臣皆驚上曰

嗟乎此真將軍矣曩者霸上棘門軍若兒戲耳其將固可襲而虜也至於亞夫可得而犯邪稱善者久之月餘漢兵至邊匈奴亦遠塞漢兵亦罷乃拜周亞夫為中尉

孝景元年夏四月遣御史大夫青至代下與匈奴和親

二年秋與匈奴和親

五年遣公主嫁匈奴單于

中二年春二月匈奴入燕

六年六月匈奴入鴈門至武泉入上郡寇死馬吏卒戰死者二千人隴西李廣為上郡太守嘗從百騎出卒遇匈奴

數千騎見廣以為誘騎皆驚上山陳廣之百騎皆大恐欲馳還走廣曰吾去大軍數十里今如此以百騎走匈奴追射我立盡今我留匈奴必以我為大軍之誘必不敢擊我

廣令諸騎曰前未到匈奴陳二里所止令曰皆下馬解鞍

其騎曰虜多且近即有急柰何廣曰彼虜以我為走今皆解鞍以示不走用堅其意於是胡騎遂不敢擊有白馬將

出護其兵李廣上馬與十餘騎犇射殺白馬將而復還至其騎中解鞍令士皆縱馬臥是時會暮胡兵終怪之不敢

擊夜半時胡兵亦以為漢有伏軍於旁欲夜取之胡皆引兵而去平旦李廣乃歸其大軍

後二年三月匈奴入鴈門太守馮敬與戰死發車騎材官

屯鴈門

孝武建元六年匈奴來請和親天子下其議大行王恢燕

人也習胡事議曰漢與匈奴和親率不過數歲即復倍約不如勿許與兵擊之韓安國曰匈奴遷徙鳥舉難得而制自上古不屬為人今漢行數千里與之爭利則人馬罷乏虜以全制其敝此危道也不如和親羣臣議者多附安國於是上許和親

諸呂之變

高祖十年定陶戚姬有寵於上生趙王如意上以太子仁弱謂如意類已雖封為趙王常留之長安上之關東戚姬常從日夜啼泣欲立其子呂后年長常留守益疏上欲廢太子而立趙王大臣爭之皆莫能得御史大夫周昌廷爭之疆上問其說昌為人吃又盛怒曰臣口不能言然臣期其知其不可陛下欲廢太子臣期不奉詔上欣然而笑

呂后側耳於東廂聽既罷見昌為跪謝曰微君太子幾廢時趙王年十歲上憂萬歲之後不全也符璽御史趙堯請為趙王置貴疆相及呂后太子羣臣素所敬憚者上曰誰可者堯曰御史大夫昌其人也上乃以昌相趙而以堯代昌為御史大夫

十二年十一月上從破鯨布歸疾益甚愈欲易太子張良諫不聽因疾不視事叔孫通諫曰昔者晉獻公以驪姬之故廢太子立奚齊晉國亂者數十年為天下笑秦以不蚤定扶蘇令趙高得以詐立胡亥自使滅祀此陛下所親見今太子仁孝天下皆聞之呂后與陛下攻苦食啖其可背

哉陛下必欲廢適而立少臣願先伏誅以頸血汗地帝曰
公罷矣吾直戲耳叔孫通曰太子天下本本一搖天下振
動奈何以天下為戲乎時大臣固爭者多上知羣臣心皆
不附趙王乃止不立初上擊布時為流矢所中行道疾甚
呂后問曰陛下百歲後蕭相國既死誰令代之上曰曹參
可問其次曰王陵可然少戇陳平可以助之陳平知有餘
然難獨任周勃重厚少文然安劉氏者必勃也可令為太
尉呂后復問其次上曰此後亦非乃所知也夏四月甲辰
帝崩於長樂宮 五月己巳太子即皇帝位尊皇后曰皇
太后 太后令求巷囚戚夫人髡鉗衣赭衣令舂遣使召
趙王如意使者三反趙相周昌謂使者曰高帝屬臣趙王
遣王王且亦病不能奉詔太后怒先使人召昌昌至長安
乃使人復召趙王王來未到帝知太后怒自迎趙王霸上
與入宮自挾與起居飲食太后欲殺之不得間

惠帝元年冬十二月帝晨出射趙王少不能蚤起太后使
人持醪飲之黎明帝還趙王已死太后遂斷戚夫人手足
去眼輝耳飲瘖藥使居廁中命曰人彘居數日乃召帝觀
人彘帝見問知其戚夫人乃大哭因病歲餘不能起使人
請太后曰此非人所為臣為太后子終不能治天下帝以
此日飲為淫樂不聽政

臣光曰為人子者父母有過則諫諫而不聽則號泣而隨

通鑑紀事本末 卷二
之安有守高祖之業爲天下之主不忍母之殘酷遂棄國
家而不恤縱酒色以傷生若孝惠者可謂篤於小仁而未
知大誼也

六年冬十月以王陵爲右丞相陳平爲左丞相以周勃爲
太尉

七年秋八月戊寅帝崩于未央宮初呂太后命張皇后取
他人子養之而殺其母以爲太子旣葬太子卽皇帝位年
幼太后臨朝稱制

高后元年冬太后議欲立諸呂爲王問右丞相陵陵曰高
帝刑白馬盟曰非劉氏而王天下共擊之今王呂氏非約
也太后不說問左丞相平太尉勃對曰高帝定天下王子

平絳侯曰始與高帝啖血盟諸君不在邪今高帝崩太后
女主欲王呂氏諸君縱欲阿意背約何面目見高帝於地
下乎陳平絳侯曰於今面折廷爭臣不如君全社稷定劉
氏之後君亦不如臣陵無以應之十一月甲子太后以王
陵爲帝太傅實奪之相權陵遂病免歸乃以左丞相平爲
右丞相以辟陽侯審食其爲左丞相不治事令監宮中如
郎中令食其故得幸於太后公卿皆因而決事太后怨趙
堯爲趙隱王謀乃抵堯罪上黨守任教嘗爲沛獄吏有德
於太后乃以爲御史大夫太后又追尊其父臨泗侯呂公
爲宣王兄周呂令武侯澤爲悼武王欲以王諸呂爲漸

太后欲王呂氏乃先立所名孝惠子彊爲淮陽王不疑爲
恒山王使大謁者張釋風大臣大臣乃請立悼武王長子
酈侯台爲呂王割齊之濟南郡爲呂國

二年冬十一月呂肅王呂薨夏五月丙申封齊悼惠王
子章爲朱虛侯令人宿衛又以呂祿女妻章

四年夏四月丙申太后封女弟類爲臨光侯少帝寢長
自知非皇后子乃出言曰后安能殺吾母而名我我壯卽
爲變太后聞之幽之永巷中言帝病左右莫得見太后語
羣臣曰今皇帝病久不已失惑昏亂不能繼嗣治天下其
代之羣臣皆頓首言皇太后爲天下齊民計所以安宗廟
社稷甚深羣臣頓首奉詔遂廢帝幽殺之五月丙辰立
恒山王義爲帝更名曰弘不稱元年以太后制天下事故
也

六年冬十一月立肅王弟產爲呂王

七年春正月太后召趙幽王友友以諸呂女爲后弗愛愛
他姬諸呂女怒去讒之於太后曰王言呂氏安得王太后
百歲彼吾必擊之太后以故召趙王趙王至置邸不得見
令衛圍守之弗與食其羣臣或竊饋輒捕論之丁丑趙王
餓死二月徙梁王恢爲趙王呂王產爲梁王梁王不之
國爲帝太傅呂類女爲將軍營陵侯劉澤妻澤者高祖
從祖昆弟也齊人田生爲之說大謁者張卿曰諸呂之王
也諸大臣未大服今營陵侯澤諸劉最長今卿言太后王

之呂氏王益固矣張卿入言太后太后然之乃割齊之琅邪郡封澤為琅邪王 趙王恢之徙趙心懷不樂太后以呂產女為王后王后從官皆諸呂擅權微伺趙王趙王不得自恣王有所愛姬王后使人酖殺之六月王不勝悲憤自殺太后聞之以為王用婦人棄宗廟禮廢其嗣是時諸呂擅權用事朱虛侯章年二十有氣力忿劉氏不得職嘗入侍太后燕飲太后令章為酒吏章自請曰臣將種也請得以軍法行酒太后曰可酒酣章請為耕田歌太后許之章曰深耕穡種立苗欲疏非其種者鋤而去之太后默然頃之諸呂有一人醉亡酒章追拔劍斬之而還報曰有亡酒一人臣謹行法斬之太后左右皆大驚業已許其軍法無以爭也因罷自是之後諸呂懼朱虛侯雖大臣皆依朱虛侯劉氏為益彊陳平患諸呂力不能制恐禍及已嘗燕居深念陸賈往直入坐而陳丞相不見陸生曰何念之深也陳平曰生揣我何念陸生曰足下極富貴無欲矣然有憂念不過患諸呂少主耳陳平曰然為之奈何陸生曰天下安注意相天下危注意將將相和調則士豫附天下雖有變權不分為社稷計在兩君掌握耳臣常欲謂太尉絳侯絳侯與我戲易吾言君何不交驩太尉深相結因為陳平畫呂氏數事陳平用其計乃以五百金為絳侯壽厚具樂飲太尉報亦如之兩人深相結呂氏謀益衰 太后使使告代王欲徙王趙代王謝之願守代邊太后乃立兄子

呂祿為趙王追尊祿父建成康侯釋之為趙昭王

八年冬十月辛丑立呂肅王子東平侯通為燕王封通弟

莊為東平侯 春三月太后被還過軹道見物如蒼犬楸

太后掖忽不復見卜之云趙王如意為祟太后遂病掖傷

夏四月封中大謁者張釋為建陵侯以其勸王諸呂賞之

也 秋七月太后病甚乃令趙王祿為上將軍居北軍呂

王產居南軍太后誡產祿曰呂氏之王大臣弗平我即崩

帝年少大臣恐為變必據兵衛宮慎毋送喪為人所制辛

巳太后崩遺詔大赦天下以呂王產為相國以呂祿女為

帝后 諸呂欲為亂畏大臣絳灌等未敢發朱虛侯以呂

祿女為婦故知其謀乃陰令人告其兄齊王欲令發兵西

其舅駟鈞郎中令祝午中尉魏勃陰謀發兵齊相召平弗

聽八月丙午齊王欲使人誅相相聞之乃發卒衛王宮魏

勃給召平曰王欲發兵非有漢虎符驗也而相君圍王固

善勃請為君將兵衛王召平信之勃既將兵遂圍相府召

平自殺於是齊王以駟鈞為相魏勃為將軍祝午為內史

悉發國中兵使祝午東詐琅邪王曰呂氏作亂齊王發兵

欲西誅之齊王自以少年不習兵革之事願舉國委大王

大王自高帝將也請大王幸之臨菑見齊王計事琅邪王

信之西馳見齊王齊王因留琅邪王而使祝午盡發琅邪

國兵并將之琅邪王說齊王曰大王高皇帝適長孫也當

立今諸大臣狐疑未有所定而澤於劉氏最為長年大臣固待澤決計今大王留臣無為也不如使我入關計事齊王以為然乃益具車送琅邪王琅邪王既行齊遂舉兵西攻濟南遣諸侯王書陳諸呂之罪欲舉兵誅之相國呂產等聞之乃遣潁陰侯灌嬰將兵擊之灌嬰至滎陽謀曰諸呂擁兵關中欲危劉氏而自立今我破齊還報此益呂氏之資也乃留屯滎陽使使諭齊王及諸侯與連和以待呂氏變共誅之齊王聞之乃還兵西界待約呂祿呂產欲作亂內憚絳侯朱虛等外畏齊楚兵又恐灌嬰畔之欲待灌嬰兵與齊合而發猶豫未決當是時濟川王太淮陽王武常山王朝及魯王張偃皆年少未之國居長安趙王祿梁王產各將兵居南北軍皆呂氏之人也列侯羣臣莫自堅其命太尉絳侯勃不得主兵曲周侯酈商老病其子寄與呂祿善絳侯乃與丞相陳平謀使人劫酈商令其子寄往給說呂祿曰高帝與呂后共定天下劉氏所立九王呂氏所立三王皆大臣之議事已布告諸侯諸侯皆以為宜今太后崩帝少而足下佩趙王印不急之國守藩乃為上將將兵留此為大臣諸侯所疑足下何不歸將印以兵屬太尉請梁王歸相國印與大臣盟而之國齊兵必罷大臣得安足下高枕而王千里此萬世之利也呂祿信然其計欲以兵屬太尉使人報呂產及諸呂老人或以為便或曰不便計猶豫未有所決呂祿信酈寄時與出游獵過其姑呂

頽頽大怒曰若爲將而棄軍呂氏今無處矣乃悉出珠王寶器散堂下曰毋爲他人守也九月庚申旦平陽侯窟行御史大夫事見相國產計事郎中令賈壽使從齊來因數產曰王不早之國今雖欲行尚可得邪具以灌嬰與齊楚合從欲誅諸呂告產且趣產急入宮平陽侯頗聞其語馳告丞相太尉太尉欲入北軍不得入襄平侯紀通尚符節乃令持節矯內太尉北軍太尉復令酈寄與典客劉揭先說呂祿曰帝使太尉守北軍欲足下之國急歸將印辭去不然禍且起呂祿以爲酈況不欺已遂解印屬典客而以兵授太尉太尉至軍呂祿已去太尉入軍門行令軍中曰爲呂氏右祖爲劉氏左祖軍中皆左祖太尉遂將北軍然尚有南軍丞相平乃召朱虛侯章佐太尉太尉令朱虛侯監軍門令平陽侯告衛尉毋入相國產殿門呂產不知呂祿已去北軍乃入未央宮欲爲亂至殿門弗得入徘徊往來平陽侯恐弗勝馳語太尉太尉尚恐不勝諸呂未敢公言誅之乃謂朱虛侯曰急入宮衛帝朱虛侯請卒太尉予卒千餘人入未央宮門見產廷中日舖時遂擊產產走天風大起以故其從官亂莫敢鬪逐產殺之郎中府吏廁中朱虛侯已殺產帝命謁者持節勞朱虛侯朱虛侯欲奪其節謁者不肯朱虛侯則從與載因節信馳走斬長樂衛尉呂更始還馳入北軍報太尉太尉起拜賀朱虛侯曰所患獨呂產今已誅天下定矣遂遣人分部悉捕諸呂男女無

少長皆斬之辛酉捕斬呂祿而呂殺呂頹使人誅燕王呂通而廢魯王張偃戊辰徙濟川王王梁遣朱虛侯章以誅諸呂事告齊王令罷兵灌嬰在滎陽聞魏勃本教齊王舉兵使使召魏勃至責問之勃曰失火之家豈暇先言丈人而後救火乎因退立股戰而栗恐不能言者終無他語灌將軍熟視笑曰人謂魏勃勇妄庸人耳何能為乎乃罷魏勃灌嬰兵亦罷滎陽歸 班固贊曰孝文時天下以酈寄為賣友夫賣友者謂見利而忘義也若寄父為功臣而又執劫雖摧呂祿以安社稷誼存君親可也 諸大臣相與陰謀曰少帝及梁淮陽恒山王皆非真孝惠子也呂后以計詐名他人子殺其母養後宮令孝惠子之立以為後及諸王以疆呂氏今皆已夷滅諸呂而所立即長用事王無類矣不如視諸王最賢者立之或言齊王高帝長孫可立也大臣皆曰呂氏以外家惡而幾危宗廟亂功臣今齊王舅駟鈞虎而冠即立齊王復為呂氏矣代王方今高帝見子最長仁孝寬厚太后家薄氏謹良且立長固順況以仁孝聞天下乎乃相與共陰使人召代王代王問左右郎中令張武等曰漢大臣皆故高帝時大將習兵多謀詐此其屬意非止此也特畏高帝呂太后威耳今已誅諸呂新啗血京師此以迎大王為名實不可信願大王稱疾毋往以觀其變中尉宋昌進曰羣臣之議皆非也夫秦失其政諸侯豪桀並起人人自以為得之者以萬數然卒踐天子

之位者劉氏也天下絕望一矣高帝封王子弟地犬牙相制此所謂磐石之宗也天下服其疆二矣漢興除秦苛政約法令施德惠人人自安難動搖三矣夫以呂太后之嚴立諸呂為三王擅權專制然而太尉以一節入北軍一呼士皆左袒為劉氏叛諸呂卒以滅之此乃天授非人力也今大臣雖欲為變百姓弗為使其黨盛能專一邪方今內有朱虛東牟之親外畏吳楚淮揚琅邪齊代之疆方今高帝子獨淮南王與大王大王又長賢聖仁孝聞於天下故大臣因天下之心而欲迎立大王大王勿疑也代王報太后計之猶豫未定卜之兆得大橫占曰大橫庚庚余為天王夏啓以光代王曰寡人固已為王矣又何王卜人曰所謂天王者乃天子也於是代王遣太后弟薄昭往見絳侯絳侯等具為昭言所以迎立王意薄昭還報曰信矣毋可疑者代王乃笑謂宋昌曰果如公言乃命宋昌參乘張武等六人乘傳從詣長安至高陵休止而使宋昌先馳之長安觀變昌至渭橋丞相以下皆迎昌還報代王馳至渭橋羣臣拜謁稱臣代王下車答拜太尉勃進曰願請問宋昌曰所言公公言之所言私王者無私太尉乃跪上天子璽符代王謝曰至代邸而議之後九月己酉晦代王至長安舍代邸羣臣從至邸丞相陳平等皆再拜言曰子弘等皆非孝惠帝子不當奉宗廟大王高帝長子宜為嗣願大王即天子位代王西鄉讓者三南鄉讓者再遂即天子位羣

臣以禮次侍東牟侯興居曰誅呂氏臣無功請得除宮乃與太僕汝陰侯滕公入宮前謂少帝曰足下非劉氏子不當立乃顧麾左右執戟者倍兵罷去有數人不肯去兵宦者令張釋諭告亦去兵滕公乃召乘輿車載少帝出少帝曰欲將我安之乎滕公曰出就舍舍少府乃奉天子法駕迎代王於邸報曰宮謹除代王即夕入未央宮有謁者十人持戟衛端門曰天子在也足下何爲者而入代王乃謂太尉太尉往諭謁者十人皆倍兵而去代王遂入夜拜宋昌爲衛將軍鎮撫南北軍以張武爲郎中令行殿中有司分部誅滅梁淮陽恒山王及少帝於邸文帝還坐前殿夜下詔書赦天下

文帝元年冬十月陳平謝病上問之平曰高祖時勃功不如臣及誅諸呂臣功亦不如勃願以右丞相讓勃十一月辛巳上徙平爲左丞相太尉勃爲右丞相大將軍灌嬰爲太尉諸呂所奪齊楚故地皆復與之論誅諸呂功右丞相勃以下益戶賜金各有差絳侯朝罷趨出意得其上禮之恭常目送之郎中安陵袁盎諫曰諸呂悖逆大臣相與共誅之是時丞相爲太尉本兵柄適會其成功今丞相如有驕主色陛下謙讓臣主失禮竊爲陛下弗取也後朝上益莊丞相益畏

南粵稱藩

漢高帝十一年五月詔立秦南海尉趙佗爲南粵王使陸

賈卽授璽綬與剖符通使使和集百越無爲南邊患害初秦二世時南海尉任囂病且死召龍川令趙佗語曰秦爲無道天下苦之聞陳勝等作亂天下未不知所安南海僻遠吾恐盜兵侵地至此欲興兵絕新道自備待諸侯變會病甚且番禺負山險阻南海東西數千里頗有中國人相輔此亦一州之主也可以立國郡中長吏無足與言者故召公告之卽被佗書行南海尉事囂死佗卽移檄告橫浦陽山湟谿關曰盜兵且至急絕道聚兵自守因稍以法誅秦所置長吏以其黨爲假守秦已破滅佗卽擊拜桂林象郡自立爲南越武王陸生至尉佗雖結箕倨見陸生陸生說佗曰足下中國人親戚昆弟墳墓在真定今足下反天性棄冠帶欲以區區之越與天子抗衡爲敵國禍且及身矣且夫秦失其政諸侯豪傑竝起唯漢王先入關據咸陽項羽倍約自立爲西楚霸王諸侯皆屬可謂至彊然漢王起巴蜀鞭笞天下遂誅項羽滅之五年之間海內平定此非人力天之所建也天子聞君王王南越不助天下誅暴逆將相欲移兵而誅王天子憐百姓新勞苦故且休之遣臣授君王印剖符通使君王宜郊迎北面稱臣乃欲以新造未集之越屈彊於此漢誠聞之掘燒王先人家夷滅宗族使一偏將將十萬衆臨越則越殺王降漢如反復手耳於是尉佗乃蹶然起坐謝陸生曰居蠻夷中久殊失禮義因問陸生曰我孰與蕭何曹參韓信賢陸生曰王似賢也復

曰我孰與皇帝賢陸生曰皇帝繼五帝三皇之業統理中國中國之人以億計地方萬里萬物殷富政由一家自天地剖判未始有也今王眾不過數十萬皆蠻夷崎嶇山海間譬若漢一郡耳何乃比於漢尉佗大笑曰吾不起中國故至此使我居中國何遽不若漢乃留陸生與飲數月曰越中無足與語至生來令我日聞所不聞賜陸生橐中裝直千金佗送亦千金陸生卒拜尉佗為南越王令稱臣奉漢約歸報帝大悅拜賈為太中大夫

高后四年夏五月有司請禁南越關市鐵器南越王佗曰高帝立我通器物今高后聽讒臣別異蠻夷隔絕器物此必長沙王計欲倚中國擊滅南越而拜王之自為功也

七年九月遣隆慮侯周竈將兵擊南越

文帝元年 初隆慮侯竈擊南越會暑濕士卒大疫兵不能踰嶺歲餘高后崩即罷兵趙佗因此以兵威財物賂遺閩越西甌駱役屬焉東西萬餘里乘黃屋左纁稱制與中國侔帝乃為佗親家在真定者置守邑歲時奉祀召其昆弟尊官厚賜寵之復使陸賈使南越賜佗書曰朕高皇帝側室之子也棄外奉北藩于代道里遼遠雍蔽樸愚未嘗致書高皇帝棄羣臣孝惠皇帝即世高后自臨事不幸有疾諸呂為變賴功臣之力討之已畢朕以王侯吏不釋之故不得不立今即位乃者聞王遺將軍隆慮侯書求親昆

弟請罷長沙兩將軍朕以王書罷將軍博陽侯親昆弟在
真定者已遣人存問修治先人家前日聞王發兵於邊為
寇災不止當其時長沙苦之南郡尤甚雖王之國庸獨利
乎必多殺士卒傷良將吏寡人之妻孤人之子獨人父母
得一亡十朕不忍為也朕欲定地犬牙相入者以問吏吏
曰高皇帝所以介長沙土也朕不得擅變焉今得王之
地不足以為大得王之財不足以為富服領以南王自治之
雖然王之號為帝兩帝竝立亡一乘之使以通其道是爭
也爭而不讓仁者不為也願與王分棄前惡終今以來通
使如故賈使南越南越王恐頓首謝罪願奉明詔長為藩
臣奉貢職於是下令國中曰吾聞兩雄不俱立兩賢不竝
世漢皇帝賢天子自今以來去帝制黃屋左毒懸因為書稱
蠻夷大長老夫臣佗昧死再拜上書皇帝陛下老夫故越
吏也高皇帝幸賜臣佗璽以為南越王孝惠皇帝即位義
不忍絕所以賜老夫者厚其高后用事別異蠻夷出令曰
毋與蠻夷越金鐵田器馬牛羊即予予牡毋與牝老夫處
僻馬牛羊齒已長自以祭祀不脩有死罪使內史藩中尉
高御史平凡三輩上書謝過皆不反又風聞老夫父母墳
墓已壞削兄弟宗族已誅論吏相與議曰今內不得振於
漢外亡以自高異故更號為帝自帝其國非敢有害於天
下高皇后聞之大怒削去南越之籍使使不通老夫竊疑
長沙王讒臣故發兵以伐其邊老夫處越四十九年于今

抱孫焉然夙興夜寐寢不安席食不甘味目不視靡曼之色耳不聽鍾鼓之音者以不得事漢也今陛下幸哀憐復故號通使漢如故老夫死骨不腐改號不敢爲帝矣

七國之叛

漢景帝前三年 初孝文時吳太子入見得侍皇太子飲博吳太子博爭道不恭皇太子引博局提吳太子殺之遣其喪歸葬至吳吳王愠曰天下同宗死長安卽葬長安何必來葬爲復遣喪之長安葬吳王由此稍失藩臣之禮稱疾不朝京師知其以子故繫治驗問吳使者吳王恐始有反謀後使人爲秋請文帝復問之使者對曰王實不病漢繫治使者數輩吳王恐以故遂稱病夫察見淵中魚不祥唯上棄前過與之更始於是文帝乃赦吳使者歸之而賜吳王几杖老不朝吳得釋其罪謀亦益解然其居國以銅鹽故百姓無賦卒踐更輒與平賈歲時存問茂材賞賜閭里佗郡國吏欲來捕亡人者公共禁弗予如此者四十餘年鼂錯數上書言吳過可削文帝寬不忍罰以此吳日益橫及帝卽位錯說上曰昔高帝初定天下昆弟少諸子弱大封同姓齊七十餘城楚四十餘城吳五十餘城封三庶孽分天下半今吳王前有太子之郤詐稱病不朝於古法當誅文帝弗忍因賜几杖德至厚當改過自新反益驕溢卽山鑄錢煮海水爲鹽誘天下亡人謀作亂今削之亦反不削亦反削之其反亟禍小不削反遲禍大上令公卿列

侯宗室雜議莫敢難獨竇嬰爭之由此與錯有郤及楚王
戊來朝錯因言戊往年爲薄太后服私姦服舍請誅之詔
赦削東海郡及前年趙王有罪削其常山郡膠西王卬以
賣爵事有姦削其六縣廷臣方議削吳吳王恐削地無已
因發謀舉事念諸侯無足與計者聞膠西王勇好兵諸侯
皆畏憚之於是使中大夫應高口說膠西王曰今者主上
任用邪臣聽信讒賊侵削諸侯誅罰良重日以益甚語有
之曰狃糠及米吳與膠西知名諸侯也一時見察不得安
肆矣吳王身有內疾不能朝請二十餘年常患見疑無以
自白脅肩累足猶懼不見釋竊聞大王以爵事有過所聞
諸侯削地罪不至此此恐不止削地而已王曰有之子將
奈何高曰吳王自以與大王同憂應因時循理棄躬以除

患於天下意亦可乎膠西王瞿然駭曰寡人何敢如是主
上雖急固有死耳安得不事高曰御史大夫鼂錯熒惑天
子侵奪諸侯朝廷疾怨諸侯皆有背叛之意人事極矣彗
星出蝗蟲起此萬世一時而愁勞聖人所以起也吳王內
以鼂錯爲誅外從大王後車方洋天下所向者降所指者
下莫敢不服大王誠幸而許之一言則吳王率楚王略函
谷關守滎陽教倉之粟距漢兵治次舍湏大王大王幸而
臨之則天下可拜兩主分割不亦可乎王曰善歸報吳王
吳王猶恐其不果乃身自爲使者至膠西面約之膠西羣
臣或聞王謀諫曰諸侯地不能當漢十二爲叛逆以憂太

通鑑紀事本末 卷二 六十二
后非計也今承一帝尚云不易假令事成兩主分爭患乃
益生王不聽遂發使約齊菑州膠東濟南皆許諾初楚元
王好書與魯申公穆生白生俱受詩於浮丘伯及王楚以
三人爲中大夫穆生不嗜酒元王每置酒常爲穆生設醴
及子夷王孫王戊卽位常設後乃忘設焉穆生退曰可以
逝矣醴酒不設王之意怠不去楚人將鉗我於市遂稱疾
臥申公白生彊起之曰獨不念先王之德與今王一旦失
小禮何足至此穆生曰易稱知幾其神乎幾者動之微吉
凶之先見者也君子見幾而作不俟終日先王之所以禮
吾三人者爲道存也今而忽之是忘道也忘道之人胡可
與久處豈爲區區之禮哉遂謝病去申公白生獨留王戊

稍淫暴太傅韋孟作詩諷諫不聽亦去居於鄒戊因坐削

地事遂與吳通謀申公白生諫戊戊胥靡之衣之赭衣使
雅春於市休侯富使人諫王王曰季父不吾與我起先取
季父矣休侯懼乃與毋太夫人犇京師及削吳會稽豫章
郡書至吳王遂先起兵誅漢吏二千石以下膠西膠東菑
川濟南楚趙亦皆反楚相張尚太傅趙夷吾諫王戊戊殺
尚夷吾趙相建德內史王悍諫王遂遂燒殺建德悍齊王
後悔背約城守濟北王城壞未完其郎中令劫守王不得
發兵膠西王膠東王爲渠率與菑川濟南共攻齊圍臨菑
趙王遂發兵住其西界欲待吳楚俱進北使匈奴與連兵
吳王悉其士卒下令國中曰寡人年六十二身自將少子

年十四亦爲士卒先諸年上與寡人同下與少子等皆發兵二十餘萬人南使閩東越閩東越亦發兵從吳王起兵於廣陵西涉淮因并楚兵發使遺諸侯書罪狀鼂錯欲合兵誅之吳楚共攻梁破棘壁殺數萬人乘勝而前銳甚梁孝王遣將軍擊之又敗梁兩軍士卒皆還走梁王城守睢陽初文帝且崩戒太子曰卽有緩急周亞夫眞可任將兵及七國反書聞上乃拜中尉周亞夫爲太尉將三十六將軍往擊吳楚遣曲周侯酈寄擊趙將軍爰布擊齊復召竇嬰拜爲大將軍使屯滎陽監齊趙兵初鼂錯所更令三十五章諸侯謹謹錯父聞之從潁川來謂錯曰上初卽位公爲政用事侵削諸侯疏人骨肉口語多怨公何爲也錯曰固也不如此天子不尊宗廟不安父曰鼂氏安矣而鼂氏危吾去公歸矣遂飲藥死曰吾不忍見禍逮身後十餘日吳楚七國俱反以誅錯爲名上與錯議出軍事錯欲令上自將兵而身居守又言徐僮之旁吳所未下者可以予吳錯素與吳相袁盎不善錯所居坐盎輒避盎所居坐錯亦避兩人未嘗同堂語及錯爲御史大夫使吏按盎受吳王財物抵臯詔赦以爲庶人吳楚反錯謂丞史曰袁盎多受吳王金錢專爲蔽匿言不反今果反欲請治盎宜知其計謀丞史曰事未發治之有絕今兵西向治之何益且盎不宜有謀錯猶與未決人有告盎盎恐夜見竇嬰爲言吳所以反願至前口對狀嬰入言上乃召盎盎入見上方與錯調

兵食上問盎今吳楚反於公意何如對曰不足憂也上曰
 吳王卽山鑄錢煮海爲鹽誘天下豪傑白頭舉事此其計
 不百全豈發庫何以言其無能爲也對曰吳銅鹽之利則
 有之安得豪傑而誘之誠令吳得豪傑亦且輔而爲誼不
 反矣吳所誘皆亡賴子弟亡命鑄錢姦人故相誘以亂錯
 曰盎策之善上曰計安出盎對曰願屏左右上屏人獨錯
 在盎曰臣所言人臣不得知乃屏錯錯趨避東廂甚恨上
 卒問盎對曰吳楚相遺書言高皇帝王子弟各有分地今
 賊臣鼂錯擅適諸侯削奪之地以故反欲西共誅錯復故
 地而罷方今計獨有斬錯發使赦吳楚七國復其故地則
 兵可毋血刃而俱罷於是上默然良久曰顧誠何如吾不
 愛一人以謝天下盎曰愚計出此唯上孰計之乃拜盎爲

太常密裝治行後十餘日上令丞相青中尉嘉廷尉歐劾
 奏錯不稱主上德信欲疏羣臣百姓又欲以城邑予吳無
 臣子禮大逆無道錯當要斬父母妻子同產無少長皆棄
 市制曰可錯殊不知壬子上使中尉召錯給載行市錯衣
 朝衣斬東市上乃使袁盎與吳王弟子宗正德侯通使吳
 謁者僕射鄧公爲校尉上書言軍事見上上問曰道軍所
 來聞鼂錯死吳楚罷不鄧公曰吳爲反數十歲矣發怒削
 地以誅錯爲名其意不在錯也且臣恐天下之士拊口不
 敢復言矣上曰何哉鄧公曰夫鼂錯患諸侯疆大不可制
 故請削之以尊京師萬世之利也計畫不行卒受大戮內

通鑑紀事本末 卷二
杜忠臣之口外爲諸侯報讎臣竊爲陛下不取也於是帝喟然長息曰公言善吾亦恨之袁盎劉通至吳吳楚兵已攻梁壁矣宗正以親故先入見論吳王令拜受詔吳王聞袁盎來知其欲說笑而應曰我已爲東帝尚誰拜不肯見盎而留軍中欲劫使將盎不肯使人圍守且殺之盎得間脫亡歸報太尉亞夫言於上曰楚兵剽輕難與爭鋒願以梁委之絕其食道乃可制也上許之亞夫乘六乘傳將會兵滎陽發至霸上趙涉逸說亞夫曰吳王素富懷輯死士久矣此知將軍且行必置間人於殺澠阨之間且兵事上神密將軍何不從此右去走藍田出武關抵洛陽間不過差一二日直入武庫擊鳴鼓諸侯聞之以爲將軍從天而下也太尉如其計至洛陽喜曰七國反吾乘傳至此不

白意全今吾據滎陽滎陽以東無足憂者使吏按殺澠間果得吳伏兵乃請趙涉爲護軍太尉引兵東北走昌邑吳攻梁急梁數使使條侯求救條侯不許又使使愨條侯於上上使告條侯救梁亞夫不奉詔堅壁不出而使弓高侯等將輕騎兵出淮泗口絕吳楚兵後塞其饜道梁使中大夫韓安國及楚相張尚弟羽爲將軍羽力戰安國持重乃得頗敗吳兵吳兵欲西梁城守不敢西卽走條侯軍會下邑欲戰條侯堅壁不肯戰吳糧絕卒飢數挑戰終不出條侯軍中夜驚內相攻擊擾亂至帳下亞夫堅臥不起頃之復定吳犇壁東南取亞夫使備西北已而其精兵果犇西

通鑑紀事本末 卷二
七十三
北不得入吳楚士卒多飢死叛散乃引而去二月亞夫出
精兵追擊大破之吳王濞棄其軍與壯士數千人夜亡走
楚王戊自殺吳王之初發也吳臣田祿伯爲大將軍田祿
伯曰兵屯聚而西無它竒道難以立功臣願得五萬人別
循江淮而上收淮南長沙入武關與大王會此亦一竒也
吳王太子諫曰王以反爲名此兵難以借人人亦且反王
柰何且擅兵而別多它利害徒自損耳吳王卽不許田祿
伯吳少將相將軍說王曰吳多步兵步兵利險漢多車騎
車騎利平地願大王所過城不下直去疾西據洛陽武庫
食敖倉粟阻山河之險以令諸侯雖無入關天下固已定
矣大王徐行留下城邑漢軍車騎至馳入梁楚之郊事敗
矣吳王問諸老將老將曰此年少稚鋒可耳安知大慮於
是王不用相將軍計王專并將兵兵未度淮諸賓客皆得
爲將校尉候司馬獨周丘不用周丘者下邳人亡命吳酤
酒無行王薄之不任周丘乃上謁說王曰臣以無能不得
待罪行間臣非敢求有所將也願請王一漢節必有以報
王乃予之周丘得節夜馳入下邳下邳時聞吳反皆城守
至傳舍召令入戶使從者以罪斬令遂召昆弟所善豪吏
告曰吳反兵且至屠下邳不過食頃今先下家室必完能
者封侯矣出乃相告下邳皆下周丘一夜得三萬人使人
報吳王遂將其兵北略城邑比至陽城兵十餘萬破陽城
中尉軍聞吳王敗走自度無與共成功卽引兵歸下邳未

至疽發背死 吳王之棄軍亡也軍遂潰往往稍降太尉
條侯及梁軍吳王度淮走丹徒保東越兵可萬餘人收聚
亡卒漢使人以利啗東越東越卽給吳王出勞軍使人鉞
殺吳王盛其頭馳傳以聞吳太子駒亡走閩越吳楚反凡
三月皆破滅於是諸將乃以太尉謀爲是然梁王由此與
太尉有隙三王之圍臨菑也齊王使路中大夫告於天子
天子復令路中大夫還報告齊王堅守漢兵今破吳楚矣
路中大夫至三國兵圍臨菑數重無從入三國將與路中
大夫盟曰若反言漢已破矣齊趣下三國不且見屠路中
大夫旣許至城下望見齊王曰漢已發兵百萬使太尉亞
夫擊破吳楚方引兵救齊齊必堅守無下三國將誅路中
大夫齊初圍急陰與三國通謀約未定會路中大夫從漢
來其大臣乃復勸王無下三國會漢將欒布平陽侯等兵
至齊擊破三國兵解圍已後聞齊初與三國有謀將欲移
兵伐齊齊孝王懼飲藥自殺膠西膠東菑川王各引兵歸
國膠西王徒跣席臺飲水謝太后王太子德曰漢兵還臣
觀之已罷可襲願收王餘兵擊之不勝而逃入海未晚也
王曰吾士卒皆已壞不可用弓高侯韓頽當遣膠西王書
曰奉詔誅不義降者赦除其辜復故不降者滅之王何處
須以從事王肉袒叩頭諸漢軍壁謁曰臣叩奉法不謹驚
駭百姓乃苦將軍遠道至于窮國敢請道醢之罪弓高侯
執金鼓見之曰王苦軍事願聞王發兵狀王頓首膝行對

曰今者鼂錯天子用事臣變更高皇帝法令侵奪諸侯地
印等以爲不義恐其并亂天下七國發兵且誅錯今聞錯
已誅印等謹以罷兵歸將軍曰王苟以錯爲不善則以
聞及未有詔虎符擅發兵擊義國以此觀之意非徒欲誅
錯也乃出詔書爲王讀之曰王其自圖王曰如印等死有
餘罪遂自殺太后太子皆死膠東王淄川王濟南王皆伏
誅酈將軍兵至趙趙王引兵還邯鄲城守酈寄攻之七月
不能下匈奴聞吳楚敗亦不肯入邊樂布破齊還并兵引
水灌趙城城壞王遂自殺帝以齊首善以迫劫有謀非其
辜也召立齊孝王太子壽是爲懿王濟北王亦欲自殺幸
全其妻子齊人公孫攬謂濟北王曰臣請試爲大王明說

梁王通意天子說而不用死未晚也公孫攬遂見梁王曰
夫濟北之地東接疆齊南牽吳越北脅燕趙此四分五裂
之國權不足以自守勁不足以扞寇又非有奇恠云以待
難也雖墜言於吳非其正計也鄉使濟北見情實示不從
之端則吳必先歷齊畢濟北招燕趙而總之如此則山東
之從結而無隙矣今吳王連諸侯之兵毆白徒之衆西與
天子爭衡濟北獨底節不下使吳失與而無助跬步獨進
瓦解土崩破敗而不救者未必非濟北之力也夫以區區
之濟北而與諸侯爭疆是以羔犢之弱而扞虎狼之敵也
守職不撓可謂誠一矣功義如此尚見疑於上脅肩低首
累足撫衿使有自悔不前之心非社稷之利也臣恐藩臣

守職者疑之臣竊料之能歷西山徑長樂抵未央攘袂而正議者獨大王耳上有全亡之功下有安百姓之名德淪於骨髓恩加於無窮願大王留意詳惟之孝王大說使人馳以聞濟北王得不坐徙封於菑川 帝欲以吳王弟德哀侯廣之子續吳以楚元王子禮續楚竇太后曰吳王老人也宜為宗室順善今乃首率七國紛亂天下柰何續其後不許吳許立楚後乙亥徙淮陽王餘為魯王汝南王非為江都王王故吳地立宗正禮為楚王立皇子端為膠西王勝為中山王

四年 初吳楚七國反吳使者至淮南淮南王欲發兵應之其相曰王必欲應吳臣願為將王乃屬之相已將兵因城守不聽王而為漢漢亦使曲城侯將兵救淮南以故得完吳使者至廬江廬江王不應而往來使越至衡山衡山王堅守無二心及吳楚已破衡山王入朝上以為貞信勞苦之曰南方卑濕徙王王於濟北以褒之廬江王以邊越數使使相交徙為衡山王王江北

梁孝王驕縱

漢文帝前二年春三月有司請立皇子為諸侯王詔立皇子武為代王參為太原王揖為梁王

五年 初帝分代為二國立皇子武為代王參為太原王是歲徙代王武為淮陽王以太原王參為代王盡得故地六年梁太傅賈誼上疏曰進言者皆曰天下已安已治矣

臣獨以爲未也曰安且治者非愚則諛皆非事實知治亂之體者也夫抱火厝之積薪之下而寢其上火未及然因謂之安方今之執何以異此陛下何不壹令臣得孰數之於前因陳治安之策試詳擇焉使爲治勞智慮苦身體乏鍾鼓之樂勿爲可也樂與今同而加之諸侯軌道兵革不動匈奴賓服百姓素朴生爲明帝沒爲明神名譽之美垂於無窮使顧成之廟稱爲太宗上配太祖與漢亡極立經陳紀爲萬世法雖有愚幼不肖之嗣猶得蒙業而安以陛下之明達因使少知治體者得佐下風致此非難也夫樹國固必相疑之執下數被其殃上數爽其憂甚非所以安上而全下也今或親弟謀爲東帝親兄之子西鄉而擊今吳又見告矣天子春秋鼎盛行義未過德澤有加焉猶尚如是況莫大諸侯權力且十此者虐然而天下少安何也大國之王幼弱未壯漢之所置傅相方握其事數年之後諸侯之王大抵皆冠血氣方剛漢之傅相稱病而賜罷彼自丞尉以上偏置私人如此有異淮南濟北之爲邪此時而欲爲治安雖堯舜不治黃帝曰日中必昃操刀必割今令此道順而全安甚易不肯蚤爲已乃墮骨肉之屬而抗剋之豈有異秦之季世虐其異姓負疆而動者漢已幸而勝之矣又不易其所以然同姓襲是跡而動既有徵矣其執盡又復殃既之變未知所移明帝處之尚不能以安後世將如之何臣竊跡前事大抵疆者先及長沙乃二萬五

千戶耳功少而最完執疏而最忠非獨性異人也亦形執
然也曩令樊鄴絳灌據數十城而王今雖以殘亡可也令
信越之倫列爲徹侯而居雖至今存可也然則天下之大
計可知已欲諸王之皆忠附則莫若令如長沙王欲臣子
勿洎醢則莫若令如樊鄴等欲天下之治安莫若衆建諸
侯而少其力力少則易使以義國小則亡邪心令海內之
執如身之使臂臂之使指莫不制從諸侯之君不敢有異
心輻湊竝進而歸命天子割地定制令齊趙楚各爲若干
國使悼惠王幽王元王之子孫畢以次各受祖之分地盡
而止其分地衆而子孫少者建以爲國空而置之須其子
孫生者舉使君之一寸之地一人之衆天子亡所利焉誠
以定治而已如此則臥赤子天下之上而安植遺腹朝委
裘而天下不亂當時大治後世誦聖陛下誰憚而又不爲
此天下之執方病大瘡一脛之大幾如要一指之大幾如
股平居不可屈伸一二指惱身慮亡聊失今不治必爲錮
疾後雖有扁鵲不能爲已病非徒瘡也又苦蹊鑿元王之
子帝之從弟也今之王者從弟之子也惠王之子親兄子
也今之王者兄子之子也親者或亡分地以安天下疏者
或制大權以偪天子臣故曰非徒病瘡也又苦蹊鑿可痛
哭者此疢是也

十一年夏六月梁懷王揖薨無子賈誼復上疏曰陛下卽
不定制如今之執不過一傳再傳諸侯猶且人人恣而不

制豪植而大彊漢法不得行矣陛下所以爲蕃扞及皇太子之所恃者唯淮陽代二國耳代北邊匈奴與彊敵爲鄰能自完則足矣而淮陽之比大諸侯厯如黑子之著面適足以餌大國而不足以有所禁禦方今制在陛下制國而令子適足以爲餌豈可謂工哉臣之愚計願舉淮南地以益淮陽而爲梁王立後割淮陽北邊二三列城與東郡以益梁不可者可徙代王而都睢陽梁起於新鄴以北著之河淮陽包陳以南犍之江則大諸侯之有異心者破膽而不敢謀梁足以扞齊趙淮陽足以禁吳楚陛下高枕終無山東之憂矣此二世之利也當今恬然適遇諸侯之皆少數歲之後陛下且見之矣夫秦日夜苦心勞力以除六國之既今陛下力制天下願指如意高拱以成六國之既難以言智苟身無事畜亂宿旤孰視而不定萬年之後傳之老母弱子將使不寧不可謂仁帝於是從誼計徙淮陽王武爲梁王北界秦山西至高陽得大縣四十餘城後歲餘賈誼亦死死時年三十三矣

景帝二年梁孝王以竇太后少子故有寵王四十餘城居天下膏腴地賞賜不可勝道府庫金錢且百巨萬珠玉寶器多於京師築東苑方三百餘里廣睢陽城七十里大治宮室爲複道自宮連屬於平臺三十餘里招延四方豪俊之士如吳人枚乘嚴忌齊人羊勝公孫詭鄒陽蜀人司馬相如之屬皆從之遊每入朝上使使持節以乘輿駟馬迎

梁王於闕下既至寵幸無比入則侍上同輦出則同車射獵上林中因上疏請留且半歲梁侍中郎謁者著籍引出入天子殿門與漢宦官無異

三年冬十月梁王來朝時上未置太子與梁王宴飲從容言曰千秋萬歲後傳於王王辭謝雖知非至言然心內喜太后亦然詹事竇嬰引卮酒進上曰天下者高祖之天下父子相傳漢之約也上何以得傳梁王太后由此憎嬰嬰因病免太后除嬰門籍不得朝請梁王以此益驕

中一年 初梁孝王以至親有功吳楚攻梁鞬見七梁王驍之得賜天子旌旗從千乘萬騎出蹕入警王寵信羊勝公孫詭以詭為中尉勝詭多奇邪計欲使王求為漢嗣栗太子之廢

也太后意欲以梁王為嗣嘗因置酒謂帝曰安車大駕用梁王為寄帝詭席舉身曰諾罷酒帝以訪諸大臣大臣袁盎等曰不可昔宋宣公不立子而立弟以生禍亂五世不絕小不忍害大義故春秋大居正由是太后議格遂不復言王又嘗上書願賜容車之地徑至長樂宮自使梁國士眾築作甬道朝太后袁盎等皆建以為不可梁王由此怨袁盎及議臣乃與羊勝公孫詭謀陰使人刺殺袁盎及他議臣十餘人賊未得也於是天子意梁逐賊果梁所為上遣田叔呂季主往按梁事捕公孫詭羊勝詭勝匿王後宮使者十餘輩至梁責二千石急梁相軒丘豹及內史韓安國以下舉國大索月餘弗得安國聞詭勝匿王所乃入見

王而泣曰主辱者臣死大王無良臣故紛紛至此今勝詭不得請辭賜死王曰何至此安國泣數行下曰太王自度於皇帝孰與臨江王親王曰弗如也安國曰臨江王適長太子以一言過廢王臨江用宮垣事卒自殺中尉府何者治天下終不用私亂公今大王列在諸侯誅邪臣浮說犯上禁撓明法天子以太后故不忍致法於大王太后日夜涕泣幸大王自改大王終不覺寤有如太后宮車卽晏駕大王尚誰攀乎語未卒王泣數行而下謝安國曰吾今出勝詭王乃令勝詭皆自殺出之上由此怨望梁王梁王恐使鄒陽入長安見皇后兄王信說曰長君弟得幸於上後宮莫及而長君行迹多不循道理者今袁盎事卽窮竟梁


王伏誅太后無所發怒切齒側目於貴臣竊爲足下憂之長君曰爲之柰何陽曰長君誠能請爲上言之得毋竟梁事長君必固自結於太后太后厚德長君入於骨髓而長君之弟幸於兩宮金城之固也昔者舜之弟象日以殺舜爲事及舜立爲天子封之於有庠夫仁人之於兄弟無藏怒無宿怨厚親愛而已是以後世稱之以是說天子徼幸梁事不奏長君曰諾乘間入言之帝怒稍解是時太后憂梁事不食日夜泣不止帝亦患之會田叔等按梁事來還至霸昌殿取火悉燒梁之獄辭空手來見帝帝曰梁有之乎叔對曰死罪有之上曰其事安在田叔曰上毋以梁事爲問也上曰何也曰今梁王不伏誅是漢法不行也伏法

通鑑纂要卷二
而太后食不甘味臥不安席此憂在陛下也上大然之使
叔等謁太后且曰梁王不知也造爲之者獨在幸臣羊勝
公孫詭之屬爲之耳謹已伏誅死梁王無恙也太后聞之
立起坐餐氣平復梁王因上書請朝既至關茅蘭說王使
乘布車從兩騎入匿於長公主園漢使使迎王王已入關
車騎盡居外不知王處太后泣曰帝果殺吾子帝憂恐於
是梁王伏斧質於闕下謝罪太后帝大喜相泣復如故悉
召王從官入關然帝益疏王不與同車輦矣帝以田叔爲
賢擢爲魯相

六年冬十月梁王來朝上疏欲留上弗許王歸國意忽忽
不樂夏四月梁孝王薨嘗買太后聞之哭極哀不食曰帝
果殺吾子帝哀懼不知所爲與長公主計之乃分梁爲五
國盡立孝王男五人爲王買爲梁王明爲濟川王彭離爲
濟東王定爲山陽王不識爲濟陰王女五人皆食湯沐邑
奏之太后太后乃說爲帝加一餐孝王未死時財以巨萬
計及死藏府餘黃金尚四十餘萬斤他物稱是

文化年未

通鑑紀事本末卷二



通鑑紀事本末卷第二

[The left page is mostly blank with visible paper texture and some faint bleed-through from the reverse side.]

[The right page contains vertical columns of text, mostly obscured by the seal and bleed-through. The text is written in a traditional style within a ruled frame.]

